


# KIJILO

 . . . pashingo pami na mambo akuvula, kwa kupwila fiftiini kwajinga ku Arizona. Ntwajinga na kimye kyawama bingi. Aye Nkambo Yesu witupesheshe bingi, byavula. Baesekele kwingila pacheche mwayila ntachikilo Nkambo, Naketekela kikye, ajo jo jishinda jaitabilwa ja kwikyubilamo, bailemo na kubulang'ana mu mpuzha, pantashi. Amiwa natangijilepo moba avula kimye kasa kikyangye kufikila, najinga na teni nangwa mpwijilo twelufu mu byonse bipwilo bikatampe biji mu Phoenix, Sunnyslope ne Tempe ne Mesa ne kuyatu kulutwe kokwa, kabiji ne kubulang'ana monse monse ne kwibatangijila kuya ku mbung'eno ya kupwila kwa moba faivi. Kabiji yajinga mbung'eno ikatampe bingi yo twabula twikalapo nayo mu Kabeta kabuyeke ka America. Kwajinga kwabaya bingi. Mbung'eno ya kajo ka kwiaula yabaya bingi, kabiji—kabiji ne apo—mbung'eno ya kajo ka mulajilo abwa bufuku.

<sup>2</sup> Amiwa kechi nakonsha kwamba kana baanga batambwile Mupashi Wazhila ne. Kyajinga—kyajinga kintu kyawama bingi kana baanga batambwile Mupashi Wazhila, kabiji kana baanga babukilwe ne—ne kupuluka, ke—ke kintu kyawama bingi. Nanchi twasata bingi kwi Lesa pa kumona kimye kibena kwenda kuya kulutwe. Bavula bantu bakatampe bayishileko. Umo wabo . . .

<sup>3</sup> Akye ki kooba bintu byawama bingi kwi Mulongo Neville. Namwene wamwingilo waku Presbyterian, kufuma ku sukuulu mukatampe wa ba Presbyterian mu . . . mu kino kyaalo, na kuzha mu Mupashi. Oo, ami, kyajinga kintu kimo, aye watambwile Mupashi Wazhila. Kabiji nanchi aye wambujile mba, waambile mba, “Amiwa njina umu wa matepu obe.” Waambile mba, “Kechi kyajinga kintu kyawamisha ne.” Waambile mba, “Kijitu pamo nobe byakutolauka, bino,” waambile mba, “Namutwajile monka mu musukuulu na kumujizha.” Kabiji waambile mba . . . Byo aji muntu mukatampe wa saikoloji kokwa, aye wibazhindamikile bonse. “Kyawama, bafwainwa Kumumvwa kimye kimo, nangwa byonkabyo,” byo aambile. Kabiji waambile mba wajinga na . . .

<sup>4</sup> Kabiji waambile mba watatwile kuzha mu Mupashi ku kipwilo kyanji, panyuma ya kutambula Mupashi Wazhila, kabiji baambile mba, “Levalandi, kimye ka kyo ukafunda lu tampulo mupya?”

<sup>5</sup> Aye waambile mba, “Umvwe kipwilo kyami kyafunda yuwe.” Nalangulukile mba akyo kyajinga kyakonsa bingi, mwayukatu, butangi bwa ki Presbyterian, ee, waambile mba, “Umvwe kipwilo kyami kyafunda yuwe.” Nanchi akyo ke

kintu kyawama. Kijitu pamo nobe ka mwaana kakacheche, wakatatatu bino nangwa byonkabyo wajinga... Kyawama, mwayuka byo afwainwa kwikala, kwikala polofesa wa sayikoloji mu Koleji mukatampe wa ba Presbyterian ku Boston, kyawama, uji mu United States.

<sup>6</sup> Namwene umo mukulumpe wa batangijila kutumbula michima ku Mayo wasapwila Mamboawama mu Mupashi ne kwamba mujimi. Oo, ami! Namwene mukwabo muntu sendwe, ao wajinga wa Bapopweshi ba pa Juba-ja butanu na bubiji, kufuma mu... Aye wajinga wa—wa—wa busendwe bwa muchima ne pashingo napo, kabiji aye, mwanamulume mukote, watambwile lubatizhilo lwa Mupashi Wazhila. Aye Wamutambwile. Bufuku bumo Na mubikile maboko mu bipango, kabiji watambwile Mupashi Wazhila. Nanchi atweba... tuji na bintu byavula bingi byaubile Nkambo yetu byo twasachila, kabiji kukijishamo kumona pa kino kimye.

<sup>7</sup> Nanchi Naambile kwi abo mba, “Bushe mwalanguluka kana ng’anyi kimye kino akyo kisungu wakosama kyo atatula kwipuzha manyi?” Kyajinga kimye Musongoshi kyo ayishijilemo, kabiji ne bantu, benengezha batwelele mukachi. Oo, Amiwa njibingi na lusekelo pa kuyuka mba tubena kwikala mu ano moba apelako. Mwamona? Naketekela mba tubena kwikala mu kimye kimo kyakila bingi kuwama akyo ntanda kyo yabula kuyuka, ponkatu pakipela kya Kwiya kwa Nkambo. Bushe akyo kechi kyawama nenyi? Nalanguluka, mba kimye kiji kyonse, Binembelo byonse bijitu pepi kufikizhiwa! Kabiji nanchi tubena kumupembelela Aye kimye kiji kyonse. Kabiji twafwainwa kwikala mukoko ku ketekela, kuuba mba, kimye kiji kyonse kyafwainwa kubiwa. Ikali bakulomba, benengezha!

<sup>8</sup> Pa imo misambo ya mepuzho ne mikumbu, Amiwa, umo, Nakumenye mishonale kufuma ku Formosa, mwanamukazhi wakine, wa myaka sebeti-fiili, kabiji wafwainwa kupita pa foote-faivi. Kabiji aye watwajijilatu na—na kwikala Wabula kusongolwa, kabiji wafwajijilwe kwikala nsongwakazhi walamba. Kabiji waambile mba wakomejile mu nzubo ya Bwinakilishitu amo “ee” walumbulula mba ee, kabiji “ine” walumbulula mba ine. Kabiji wakomejile mu lufunjisho kwakonsa. Kabiji waambile mba, “Mulongo Branham, pa kimino kiji pepi nobe, oo,” waambile mba, “pepi nobe myaka eiti, Nalangulukile mba Nاپaine bumi bwami kwi Nkambo Yesu.” Aye waambile mba, “Pepi nobe myaka twelufu, Naongwelwe ku wamwingilo umo wa mu dinominesheni imo, amba Nafwainwa kutumbula mapesho a bubiji,” kabiji waambile mba, “kabiji wajinga wajimbaikwa mu kikye.” Bino waambile mba, “Pepi nobe myaka sebetiini, Amiwa kine natambulwijile Mupashi Wazhila.” Kabiji aye wabwela kuno na kweseka kubusha bimo bibye bipwilo bya Baptist byalala mutulo. Aye waambile mba inge—inge kujipo kintu kimo kyo amwene kyajinga “kufwa,”

ayemwine ke Baptist, waambile mba, “bushe abye bipwilo bya ki Baptist kuno byafwa.” Aye wibitelele mba “mwa kubika mibiji yafwa.”

<sup>9</sup> Naambile mba, “Kyawama, Naketekela inge uji ku nkondo kulutwe...” Naketekela pano uji...Nalangulukaitu, ami, fifite-tuu, aye wajinga mishonale Amiwa kasa kyangye kusemekwa ne. Kabiji pano Nalanguluka mba Mbena ku komesha bingi kya kukakalwa kwingila mwingilo. Kabiji Nalanguluka mba, “Ami, ndekelaiko mambo, Nkambo.”

<sup>10</sup> Kabiji aye, wawama, wawaina kabiji wa maana byo afwainwa kwikala. Kabiji pano ke ambule byakupitamo biji mulwendo, kabiji ne byakebewenga Mamboawama mu Formosa ne—ne mu China, ne Japan, ne bikwobotu. Nanchi bamubwezhezhe kufuma mu mwingilo, baambile mba, “Obewa kechi wakonsha kuya mu mwingilo kasa wapitaila myaka sebete, mwayukatu.” Nanchi ba mubwezhezhe. Bino aye kechi usakuzhindamatu ne, ubena kuya ku onse ma mbung’eno a ba Baptist. Kabiji aye waambile mba, “Billy Graham,” waambile mba, “jishinda jo asendelamo mbila ya ba Baptist, kyajinga ke mambo ku kipwilo kya Baptist.” Waambile mba, “Aye kechi wibatwala palepa bulongo kyakuuba mba batambule Mupashi Wazhila ne,” waambile mba. Oo, nyenga, ikala bulongo nakyokyo. Abyo ibyo. Aye waambile mba, aba ma Chinese kunyuma kokwa, waambile mba kechi ukebaleka kuya kulutwe na kwamba mba, “Atweba twaketekela Yesu Kilishitu.” Waambile mba, “Abyo bijitu bulongo,” bino waambile mba wiibalengejile kwikala momwa poso kintu kimo kyamweka, kabiji ipo po baikela Benakilishitu bakine.

<sup>11</sup> Naambile mba, “Abyo byobyoyo kiiya, nyenga. Obewa babuletu, wibaleka baikala poso kintu kimo kyamweka.”

<sup>12</sup> Pano ibyepi batumwa umvwe baambile mba, pano, pakpitapo moba naini, “Twaketekela mba tuji Nanji, monai, twayai Twikiswetu konka ku lwitabilo kabiji ne kutwajijila na mwingilo wetu”? Mwamona, kechi kyafwaijilwe kwingila ne. Bapembejile popa poso byo bayukile mba kintu kimo kyamweka. Kabiji alo lolukatazho lujiko leelo, kechi tupembelela kimye kyabaya ne. Kyawama, ao oene mambo palutwe twakonsha kwikela musango uji yense wa bumi, kuuba kintu kiji kyonse, kechi kitulengela kutako muchima ne, mambo kechi tupembelela kimye kyabaya bulongo ne. Jaleelo tuji monka, keesha twalupukamo, kabiji mu *jije* jishinda ne *joja* jishinda. Inge twapembelela kimye kyabaya bulongo poso twatwelamo ne kushinka kizhilo panyuma yetu, nanchi usa kwikala popa. Obewa wabikwa katetesho poso juba ja bukuzhi bobo. Amiwa njibingi na lusekelo pa kyokyo.

<sup>13</sup> Kabiji twajinga na kimye kyawama bingi, monka mo Naambijile, ku Phoenix kabiji ne mu kipachiko kabiji ne bavula

Benakilishitu kokwa, bavula ba mwiabo kasa bakwachichijilatu na bumi bwa butemwe.

<sup>14</sup> Naile ku Mutumba wa Kabeta kabulenge, bakazhi kunyuma kokwa, ne Ami. Juba jimo kimye, balunda, mulongo wami, Doko, walamine basongwakazhi babiji, kabiji—kabiji Mulongo ne Nyenga Wood balamineko nsongwalume, kabiji ami ne bakazhi bami twajinga na kukokoloka kwa bubiji kwa masongola. Kabiji aye waambile mba, “Bill, wayukatu, kuno kwajinga kukokoloka kwakilapo kuwama pa kutanshi.” Waambile mba, “Kimye kitanshi kyo twaile nakukokoloka kwa masongola, kintu kyo Naubile ke kwikala pa kambi ne kupembelela amba mubwele kufuma na kwipaya nyama,” byo byo aambile aye.

<sup>15</sup> Amiwa naingijishe nyingijilo imo, mwayukatu. Nalangulukile mba, “Kyawama, pano, Amiwa kechi nji na mali avula ne.” Neafiile mu kikopo kya bunga bwa kututumusha, afikilamo kuya mu lwendo lwa bupalu, nangwa byokabyo Nasongwelenga mu kimye kya kisalo. Nanchi Nalangulukile mba, “Nekilengelatu kikeele pamo,” mwayukatu. Kabiji—kabiji kimye kyo Kayanga palwendo lwa bubinda, kyafwainwa kwikala kukokoloka kwa masangola, mwayukatu, kabiji nanchi kyajinga kya kwitukosesha. Pakuuba kikye kimye twalipijile kabiji kine byo twaile, kabiji, kika, twajinga na kimye kyawama bingi.

<sup>16</sup> Kabiji bavula ba mwiabo bafumine ku tabbanako kuno. Naketekela mba Mulongo Sothmann, kisemi kyanji kiji kunyuma kokwa, ne Mulongo Tom Simpson ne bakwabo, ne Mulongo Maguire, kabiji twajinga na bimye byawama mwi Nkambo.

<sup>17</sup> Kabiji nanchi twaile ku Mutumba wa Kabeta ka bulenge, ao waikelatu ku kabeta ka buyeke bwa Phoenix, ne kufuma ku kinemenezhi. Uu! Kinemenezhi kya muzhi wakatataka! Kechi kyakukumya ne inge bantu batatula kuyuzha ntanda, bubu, kabiji ne malwang’ano atwelamo. Kabiji Natajile kokwa, kabiji twaikela peulu pakuuba mba twafwainwa kumona kipachiko kya Phoenix, byo Naabile ku mukazhi, “Nakumya kana bimye binga, kufuma po twaikala muno mu ao mamineti fifitiini, kyakuuba mba Jizhina ja Nkambo ja endelekwa mu yewa muzhi?” Hmm?

<sup>18</sup> Pepi nobe, kyawama, kusa ya muzhi, kusenda Tempe ne—ne Sunnyslope, ne kupita momwa, Naketekela mba muji bantu pepi nobe milyoni umo mu kyokya kipachiko. Naabile mba, “Pamyaka fiili adulendi yapitapo kechi mwajingapo kintu nangwa kimo ne kanatu bukusa ne kilambwe. Kabiji kapepo, ku meso akwa Nkambo, kyafwainwa kuwama inge kyajinga muyewa musango.” Abyo ibyo. Nangwatu mukatampe—mukatampe muzhi ye bashimika kokwa, kabiji ne manzubo awama ne bikwabotu, byavula. Bino kyakonsha kwikala

kyawama, kyafwainwa kwikalatu bulongo inge mwanamulume ne banabakazhi na kwendauka mu mikwakwa na maboko abo asutulwa mwiulu, na kutumbijika Lesa ne kumusachila Aye. Bino, mukifulo kya kyokyo, ke mafingo, na kuuba bintu, na kutoma. Pano umvwe mwaswisha lupipu lwa bwikalo, ne bubipisho bwikalapo.

<sup>19</sup> Naambile mba, “Bukende buunga bwaubiwe bufuku bwapita, bufuku bwapita mu uno muzhi! Baanga bapendelwe! Manzubo aanga... Bintu biinga—bintu biinga byatama byaubiwa mu awala umo wapitapo, mu uno muzhi mukatampe!”

<sup>20</sup> Kabiji mukazhi wang’ambijile mba, waambile kintu kimo kiji bibye, nobe byo Nalangulukilenga, “Ng’anyi buwame bwa kwiiya kuno? Kika kya kufumina ku nzubo ne kwiiya kuno?”

<sup>21</sup> Nanchi Naambile mba, “Abye byobyoby kiji. Panyuma ya byonse byo, abyo kine byo bitanwa mu bavula, bino kokwa kuji bacheche. Yiinga milombelo ya kishika yalombelwe bufuku bwapita kokwa, pa kwiiyatu na kupwila?”

<sup>22</sup> Kabiji Aye wajinga wawama bingi kwi atweba kyakuuba mba bipwilo mwayujile bantu kasa jikyanyge kuzhika ne, kyakuuba mba kechi wakonsha kutwela mu mabaza a yoya mpuzha ne. Kabiji atwa tubungwe ne bikwabotu, kabiji ne Nkambo wayitulwijile Mupashi Wanji ne kwibapesha. Kabiji Amiwa kechi najingapo na kinyu kikwabo ne, bino natwajijiletu na kusapwila Mamboawama. Kabiji bimye bimo, nangwa byonkabyo, kikala kyakonsa, bino jojokatu jishinda mo Nekiyukila. Kikala kyakonsa kuno. Nanchi kikekala kya konseshatu ku Kipona kya Buchibishi bwa mambo ako ko tukemana. Nanchi, byonse pamo, byajinga kintu kyawama bingi. Kabiji twakeba kusachila kipwilo kuno pa kwitulombelela kabiji ne kukwachijila pamo ne atweba, kabiji—kabiji ne kwi tufwenya kwipi na musalabo.

<sup>23</sup> Kabiji pano kubwela kuno ku muzhi, kuno, kabiji Nakufwainwa lukeelo luno kapepo kulombelela bamo bakolwa. Amiwa njina misambo ya mepuzho ne mikumbu ayo ibena kupembelela, makatazho amo o Njinao pa mooba avula kufuma po Naishijile kuno, apembelela ng’ondo umo kufuma po Nayijile. Nanchi babena kweseka kwialeta bukiji bukiji, kufuma ku mapuzha apusanapusana ko atanwa.

<sup>24</sup> Aye Nkambo inge waswa, pepi nobe pa milungu ibiji, Amiwa mbena kuya ku Tucson, ako ke lubaji lwa kukipela. Kabiji pa kino kimye banabalume basulu, nanchi lombai pa kikye... Amiwa kechi natemwa kubapo kintu kiji kyonse ne kanatu patanshi Naketekela mba kyo kyaswa muchima wa Nkambo. Pano, mbung’eno ikwabo ibena kwiiya ku Modesto kabiji kufuma kokwa ke ku Washington, kibuji kya, Washington, ne ku Zurich, ne ku Palasitani, apa bino ke ku South Africa. Kabiji byonse byo byafwainwa kubiwa kufuma pano kufika ne mu Kapyatoto.

Kabiji Naitwa kwikala musapwishi pa yonse ye mbung'eno. Kabiji kyakonsha kuupa jishuko ja kwikala mu South Africa ne jikwabo. Lwito lwabo, kila ng'ondo ntutambula lwito. Bino umvwe umo . . .

<sup>25</sup> Kuji lwabano lwabaya bingi mu bipwilo, bipwilo bya Kipentekosito. Kabiji inge waya ku lubaji lumo, lukwabo kechi bajipo na kintu kimo kya kwingila nakyo ne. Kabiji kechi bekala na lumvwang'ano lumo ne, nanchi Naimenetu pepi nobe myaka faivi na lwito mu muchima wami lwakuya. Kabijin pano, kapepo inge banabalume basulu bakonsha kutambulwila, kyafwainwa kuuba mba naikajikwa, akyo ke kufuma ku mbaji yonse ibiji, mwamona, nanchi akyo kilengela bonse kwiiya pamo. Nanchi bonse bafwainwa kwiiya na lumvwang'ano lumo mambo a kukabila kwa bya bumali—kukabila kwa bipwilo byabo kuji konka, nanchi bafwainwa kwiiya na kupulusha kilungi kyabo, mwamona. Nanchi kapepo kyafwainwa kwikala kyaswa muchima wa Nkambo, nangwa byonkabyo, Amiwa kechi nayuka ne. Kibena kumvwanika bulongo, bino kechi Nayuka ne.

<sup>26</sup> Kabiji pano, mu uno mwaka, Mulongo Borders wapa mutanchi wa lunengezho, nangwa, wa lwito. Kabiji, kwamba kinshika, wajinga buuku wabaya *byobya* lwaiya kufuma pa kimye kya Kimishimishi, lwito lwaiya kufuma konse konse. Ke lukatazho lwabaya bingi muntu kweseka kwilupwisha, nanchi Amiwa kechi nasendapo nangwa lumo ne. Amiwa nsakutolapo mbung'eno imotu, kabiji ne kupembelela kana kwepi Nkambo nkoakonsha kumbuula kuya pa kufuma kokwa, nanchi apo ipo po Nkaya jalondelapo, kabiji kwalondelapo, kabiji konse Aye nkoakambula kuya. Nanchi, ndombeshaipo.

<sup>27</sup> Navuluka mwaka wapwa, kookwa na Mulongo . . . nangwa Nyenga Cox kookwa, kimye Mulongo Arganbright kyo angichile kuya palwendo lwa kufika ku Anchorage. Pano ibyepi umvwe Nayiile kasafwanyikizha amba kijitu bulongo?

<sup>28</sup> Pano, Nalangulukilenga mba, *kufwanyikizha*, Nasapwijile pa yeo mutwe. Naambile byo Nayiile kookwa, na bujile bansongwalume ba ma tepu, “Kusenda ma tepu ne. Kulondelela tenangwa umo ne, Amiwa nsakusapwila pa mitwe imotu yo Nasapwijilepo kuno.” Nalanguluka mba Nasapwijile umo yeka ye Naubilepo kuno, yonse yashala yajingatu ipya. Kabiji Mulongo Maguire wi atambwile, onsetu.

<sup>29</sup> Kufwainyikizha. Nanchi inge Nayiile, na *kufwanyikizha* kookwa, kyafwayijilwe kwikala kyapusankotu kukila byo kyaikele, kimwesho inge kechi kyafikizhiwe ne. Pakuuba kimwesho kyafikizhiwe, kabiji anweba bonse mwayukisha kyokyo, Nkambo byo etupesheshe.

<sup>30</sup> Bino, kuji kintu kikwabo kyaikala pa muchima wami pa kimye kyabaya. Kipwilo, kilombelelaiko. Anweba bantu bonse

muno mwayuka mba kufumatu kimye kyo Najinga nsongwalume mucheche Amiwa kechi naikala wantondwa mu kino kyaalo ne. Muchima wami yense wakebeshanga kwikala ku Muzhika. Kabiji Navuluka kimye kyo Nakupilenga nsono ku bako-bami-babakazhi kokwa mu kampuzha kakacheche ako kajinga... yajinga ya kipwilo kuno, aya mpuzha. Naikele pa tampulo, kabiji Mupashi Wazhila waambile kwi amiwa, Aye waambile mba, “Amiwa kechi nakonsha kutwajijila na kukupesha ne kanatu Amiwa nankokela mu byonse, nobe byajinga Abulahama.” Mwamona? Kabiji, Abulahama, Lesa wamwambijile mba e abanye aye mwine ne kwikala kwa bunke boobe. Kabiji, byo aubile byobyoyo, wasendele bashanji, mwipwa wanji. Kabiji poso Abulahama byo akokejiile Lesa, po kwajinga kufikizhiwa kwa byonse Lesa byo amulayile. Kabiji kya kukasa, kine kintu kyankashile amiwa kuno, bajinga ba maama. Mwayuka kyokyo. Kabiji pano bamaama baya na kwikala ne Nkambo Yesu. Kabiji Amiwa—Amiwa kechi nayuka jishinda ja kuyamo ne, ne byakuuba, nanchi ndombeshaipo.

<sup>31</sup> Pano, Mulongo Neville, Nafumine kuno ku pulatifomu, Nalangulukile mba, “Kyawama, Nsakuya konka.” Muntu umo wakumenye ne kwaamba mba, “Ami, baji na mpwijilo yabaya bingi bufuku buno.” Waambile mba, “Basakwikala na kupwila kwa kusapwila, pwijilo ya kwimba, pwijilo ya milombelo, kabiji ne kutambula bupe, kabiji pano baambile mba baji na—baji na nkwiomvwa-kumaulu, kijilo, ne lubatizhilo lwa mu meema.”

<sup>32</sup> Nalangulukile mba, “Mulongo kamulanda! Ami! Ami, byonse byo, Nayuka byo kiji, kapepo panyuma ya kusapwila kyakosa lukeelo luno.” Pano, Nalangulukile mba, “Amiwa nsakupichilako kokwa, kapepo aye ukakeba amiwa kupana kijilo.”

<sup>33</sup> Kabiji aye waambile mba, “Wakonsha kwamba kwi atweba bufuku buno inge watundaikwa nyi?” Nanchi Nayuka byalumbulula kyokyo. Nanchi nayiile kunyuma kabiji natolele Kinembelo ne byanembwa bicheche, kabiji kapepo aye Nkambo usakukwasha kusapwila Mbila yaipipa iji pepi nobe maawala foolo, kabiji ipo potusakwikala na kwetu—kwetu kwi omvwa-kumaulu, bino apa ke kijilo. Kabiji pano, kabiji, oo, Amiwa, kapepo nsakufika bukiji bukiji. Ine, Amiwa najikwimusekeshangatu. Pepi nobe tweti, mamineti sate, kabiji popo tukekala na lubatizhilo lwa mu meema, ku mauulu... Kika kilondela bibye, kijilo? Kijilo kilondela bibye, apa bino ke lubatizhilo lwa mu meema.

<sup>34</sup> Pano, twasekela na mambo akuuba mba mubena kuya na kubatizhiwa. Pano, inge Lesa waswa kabiji Aye kya mutokela kumuchima, kabiji kijitu bulongo kwi kafunga ne bantu, Pamulungu wiya lukeelo Amiwa kekalako na kulombelela bakolwa, ne kwamba, inge Nkambo waswa, Pamulungu pabena kwiya, mambo kapepo Pamulungu pa

londelapo Amiwa kafumapo ne jikwabo. Kabiji pano inge Nji mukachi, Natenwa kwiya na—na kwamba kuno, mambo atweba twakwatakana pamo nobe balongo, ne Mulongo Neville kabiji ne Amiwa kuno, kabiji atweba—atweba twitemwa umo ne mukwabo, kabiji atweba—atweba—atweba twakeba kwikala pepi ne kwikwasha umo ne mukwabo. . .

<sup>35</sup> Akye kyumvwanika nobe myendeleko, bino Naketekela kechi kyafwainwa kumvwanika byo kwi anweba ne, Mr. Cory kimye kimo waambile mba, aye. . . Najinga mu kipekenyi kya malapi, na kupotesha ma golombu a kapanyi. Kabiji aye wapotele ma golombu avula afwainwa ku mulama pa foolo nangwa myaka faivi, Naalulukile napota Ford kufuma kwi aye. Aye waambile mba, “Billy, Naketekela mba tubena kwikwashatu umo ne mukwabo.” Nanchi akyo, kyawama, kijitu nobe kwikwasha mu kimye kya kukabila. Nanchi akyo—akyo kijitu bulongo. Twayuka bya kwipokolola atweba bene na bene kabiji ne kwikwasha umo ne mukwabo.

<sup>36</sup> Pano, twayai tuye ku lubaji lwa bukishika bwa kikye, kabiji inge Amiwa kechi nji na kilubo ne, Naketekela Namona Mulongo Beeler kunyuma kokwa, wamwingilo mukwabo. Kabiji leelo byo Najikupitanga, Mulongo Junie Jackson wakwimana byobya mu lubaza na Mulongo Creech. Bushe baji na mwingilo kuno kimye kimo nyi? Lubatizhilo lwa mu meema, Namona. Kijitu bulongo, twakonsha kubikamo meema inge kwaikala muntu wakubatizhiwa. Atweba—atweba tuji na meema, kijitu bulongo.

<sup>37</sup> Nanchi pano, byo tubena kwikala na kijilo, Nalanguluka mba kyafwainwa kwikala kyawama inge Naamba pa kijilo pa mamineti acheche.

<sup>38</sup> Pano, kasa tukyangye kufwenya ku Kyambo, twayai tushe bintu byonse pano, kabiji ne byonse bya bwanyike bwetu ne mashinda a bwanyike, kabiji—kabiji ne kufwenya mu Kyeenyi kya Lesa monka mu milombelo. Twayai tulombe. Pano na mitwe yetu yakunama, kabiji Naketekela mba ne michima yetu pamo, inge mujipo kya kukabila muno kyafwainwa. . . kyo mwafwainwa kutemwa kuyukanyikwa kwi Lesa, kabiji mwatemwa amba amiwa ne muvulukeko ku meso akwa Lesa, mwafwainwa kusutulako kuboko kwenu kwi Lesa. Lesa panai kiji kyonse kabiji ne kukabila kwa muntu yense.

<sup>39</sup> Lesa Wabulume bonse, aye Taata wa Nkambo yetu Yesu Kilishitu, Awo wamusangwile Aye kufuma mu bafu ne kumwikajika Aye ku kilujo kya Jitanda, waikala myaka na kulombelela byobya bintu byo twaketekela mba Aye witubijile byo, kabiji byo twashimuna mba byo kiji. Twalomba, Nkambo Lesa, amba bufuku buno, amba Anweba mwitulekeleko bubu bwetu. Oo, twakeba kulamwa mushi ya Mashi bimye byonse, mambo kechi twayuka ne kyakonsha kumweka. Bintu byonse byafikizhiwa, twaketekela, Nkambo, amba kwiya kwa



Nkambo kwafwenya kwipi. Kabiji tubena kupembelela kwikala palwendo. Kabiji byo tulanguluka pa byalwendo, twafwainwa kulanguluka pa bya masutukesi, ne—ne byakumvwala bikwabo kabiji ne sapato ikwabo. Bino alwe lwendo lwaikala lwapusanako! Kechi kulonga ne; ke kulongolola, na kwibitula kulubaji lumo. Nobe kalume Wenu mukatampe, Paulo, waambile mu Buuku wa Bahebelu, kyapitala kyabu 12, “Twayai tushe kinemenezhi kiji kyonse kabiji ne kubula lwitabilo lwi tutwala lubilo mulweseko, amba tunyeme na butekanye kikokwanyi kyabikwa kulutwe yetu.”

<sup>40</sup> Kabiji kechi twakonsha kwaula pa bintu byawama ku ino ntanda yakatataka ne. Kintu kimo kyo twakonsha kwaula mu Mupashi ke malwa, lukatazho, bitetashi, manyaki akatampe, juba ne ng’ondo byakakalwa, kipwilo mu nkulo ya Laodikeya, Kilishitu pangye ya kibelo, na kunkokosha pakuuba mba atwele mukachi. Anweba Lesa! Nobe Mikaya wakala, wafwaijilwe kupesha Ahaba byepi bungauzhi kasa bwamukana? Kimye awa ngauzhi mukatampe, Elaija, byo aile kwi aye, kabiji mambo waonawine bumi bwa yewa muntu wabula mambo, Naboth, nanchi waambile mba, “Bakabwa bakalakita mashi obe.” Pano nga Mikaya wakonsha kwaula bintu byawama byepi?

<sup>41</sup> Pano nga baana bayulwa—Mupashi leelo bafwainwa kwaula byawama byepi ku ba bubi, bantu bapusanako abo bapangila Nkambo pangye? Anweba Lesa, twamonatu bukaji bwa buchibishi bwa mambo kulutwe. Kabiji ne kubijika ku booba babula koloka, “Nyemenai kwi Nkambo, mambo Aye ye Jibwe mu ntanda ya kunkoka! Aye yo Nzubo mu kimye kya kipupu. Kabiji Jizhina ja Nkambo jo Jikebo ja Bulume, kabiji baoloka banyemena Monka ne kwikala na mutende.” Pano twakonsha kulanguluka byepi pa iye mizhi ikatampe yashimikwa, ya kufyamamo, kabiji upang’ang’ana...inge muntu watwela mu—mu kyamba, aye waikela na mutende, kafwako kintu kya kumukwata ne. Anweba Lesa, twayai tunyeme bukiji bukiji kwi Nkambo, mambo Aye ye Kyakufyamamo ne Bulume bwetu, kabiji bukwasho bujipo mu kimye kya makatazho. Nanchi, pa kumona na jiso ja mpungu, nobe byo kyajinga, lukatazho ke lwiye, makumbi abena kunyema lubilo, bilulumo ne kubesha kwa buchibishi bwa mambo pano pantanda, twayuka mba awa mwela mukatampe uji pepi.

<sup>42</sup> Bufuku buno, Nkambo, twalombelela baabo bantu bakusutula maboko abo. Amiwa kechi nayuka kyo babena kukeba ne, Taata, Anweba mwayuka. Nalomba mba Anweba musakupana bintu byonse ku myeo yabo yawama, amba kilumbululo kya kunyuma ya kokwa kuboko kwasutulwa. Kiswishai kye, Nkambo. Bukai bakolwa. Tekeneshai bakooka. Panai lusekelo ku boobanyataula. Panai mutende ku bakooka, kajo ku bafwa zala, bya kuntoma ku bafwa kilaka, lusekelo ku babulanda, bulume ku kipwilo. Nkambo, letai Yesu mukachi

ketu bufuku buno, byo tubena kukeba kuja kijilo kyaimenako mubiji Wanji watebuka. Twalomba, Nkambo, amba Aye usakwitupepula mu musango mukatampe.

<sup>43</sup> Peshai kino kipwilo kicheche, kafunga wakyo watemwikwa, Mulongo wetu Neville ne kisemi kyanji, kabiji bakwasho, baketekelwa, kabiji ne muntu yense uji muno. Peshai bakwabo, Nkambo, kuzhokoloka ntanda yonse, abo babena kupembelela na lusekelo lwa kwiya kwa Nkambo, malapi atokeshiwa, kabiji ne bitofu byonse byatokeshiwa, kabiji ne Kyeya kya Mamboawama kasa kyatemena mu fishi.

<sup>44</sup> Pano, nkwashai, Nkambo, na bibye Byambo bicheche. Peshai Byo tubena Kwikitanga, ne kwitupa kilumbululo, mambo twikipuzha mu Jizhina ja Yesu. Amena.

<sup>45</sup> Pano twakonsha kuzhikula mu Buuku, mu kyapitala kyabu 6 kya Yoano Wazhila, kabiji kyafwainwa kwikala kyawaina inge atweba bonse twatanga kyapitala yense pa kuya ku nzubo. Nakonsha kutemwa kutanga, kutatwila pa veeleshi wabu 47, kufika ne pa wabu 59, kunungakanyatu, ke jishindatu ja kumwenamo kibaaba pa yuwe mutwe wa: *Kijilo*.

Yesu ubena kwamba pano, pa kijilo. Kyajinga kimye kyawama, abye bijilo byo byajinga. Batomenenga meema kufuma ku jibwe, kwimenako Jibwe jajinga mungyetu. Kabiji bajilenga, mambo aa manna aponene pa myaka yavula yapichile, mu kuvuluka. Kyajingatu kijilo kya lupitailo, nobe byonka byo tuji nakyo bufuku buno.

*Kine, kine, Nemwambila namba, Awa wangitabila amiwa uji na bumi bwa myaka.*

*Amiwa ne shinkwa wa bumi.*

*Bashakulu benu bajilenga manna mungyetu, kabiji bafwa.*

*Awe ye shinkwa ufuma mwiulu, aoo muntu ye akonsha kujako, kabiji ne kufwa ne.*

*Amiwa ne shinkwa muumi aoo wafumine mwiulu: inge muntu waja kuyuwe shinkwa, aye ukekala na bumi bwa myaka ne myaka: kabiji awa shinkwa ye Nkapana ke mubiji wami, ye Nkapana mu bumi bwa panopantanda.*

*Abo Bayudeya bepachikilenga abo bene nabene, na kwamba mba, Awe muntu wakonsha kupana mubiji wanji byepi mba tuje?*

*Kabiji Yesu wibambijile mba, Kine, kine, Nemwambila namba, Kanatu anweba mwanja mubiji wa Mwaana muntu, kabiji ne kutoma mashi anji, obewa kechi uji na bumi mwi obewa ne.*

*Kabiji yense uja mubiji wami, ne kutoma mashi ami, uji na bumi bwa peenape; kabiji Amiwa kamusangula mujuba jikapelako.*

*Mambo mubiji wami ke kajo kakine, kabiji ne mashi ami ke byakutoma byakine.*

*Awa uja mubiji wami, ne kutoma mashi ami, waikala mwi amiwa, kabiji Amiwa mwi aye.*

*Byonka byo bantuma Bataata, kabiji Ne amiwa byonji na bumi mwi Bataata: nanchi awa uja amiwa, ne aye ukekala na bumi mwi amiwa.*

*Awe ye shinkwa ufuma mwiulu: kechi nobe byonka byajile bashakulu benu manna, kabiji ne kufwa bafwa: pakuuba awa waja. . .awe shinkwa ukekala na bumi myaka ne myaka.*

*Abye bintu wibyambile mu shinagonga, byo afunjishenga mu Kapenama.*

<sup>46</sup> Lekai Nkambo apeshe Kyambo Kyanji. Nasaka kuuba, pa mamineti acheche, kwamba pa: *Kijilo*. Pano kyambo kya *kijilo* kyalumbulula ka? *Kushilang'ena* kyalumbulula mba “kwisamba.” Kwikala, ku. . .*Kijilo* kine kyalumbulula mba “kwikala na lumvwang’ano lwa bupopweshi, kwamba umo ne mukwabo.” Inge mwisamba pa foni na muntu umo, mwaikala na misambo popa, anweba mubena kushilang’ena umo ne mukwabo. Kabiji inge twakonsha kubwela kulubaji lukwabo ne kwimana kunyuma ya kishimikwa, muntu yense ne kafunga, nangwa bantu baji babiji, abo babena kushilang’ena umo ne mukwabo.

<sup>47</sup> Pano, kechi mushilang’ena pa waileshi ne, mambo kechi wakonsha kukumbula ne, nangwa pa televizhonyi. Bino umvwe. . .Mwakonsha na telefoni, mambo mubena kushilang’ena umo ne mukwabo, kechi ke lubaji lumotu ne. Ke. . .Amiwa kechi nakonsha kushilang’ena pamo ne anweba ne, mambo kechi mwakonsha kwamba mwabwezha ne. Nanchi, onkao mambo, kechi ke kwiya na kumvwa wa mwingilo ubena kupana mbila yanji ne. Akyo kechi kyakonsha kwikala ne, kwiya pamo, na kushilang’ena. *Kijilo* kechi kyafwainwa kwikala byobyoby ne. . .Inge waiyatu na kushilang’ena na wa mwingilo umo, wafwainwa kumwita ku lubaji lumo, nangwa uji yense bunke bwanji, ne kushilang’ena nanji wamulume nangwa wa mukazhi.

<sup>48</sup> Pakuuba kyo twiiyako, *kijilo*, ke kya umo umo pa bunke bwanji kushilang’ena na Kilishitu. Ako ke kushilang’ena. Nanchi, kushilang’ena kechi ke *umotu* ubena kwamba ne, ke atweba bonse tubena kwambang’ana, bino kupembelela kabiji ne kumona byo Akumbula kwi atweba.

<sup>49</sup> Bino, apo ipo, bimye byavula, po tulengela bilubo bikatampe, ke kuuba mba, atweba yetu twamba kwakubula kupembelela Aye amba apane mukumbu ne. Atweba bimye bimo, na kwamba mba, “Nkambo, Amiwa nasaka kuuba mba Anweba mube *kikananga-ne-kikananga* kabiji *kikananga-ne-kikananga*, amena,” kabiji waimana wafumapo. Pano, ako kechi ke kushilang’ena ne. Ako ke kuya na kwipuzha mba bakubilepo kintu kimo. Pakuuba inge waikala kimye kyabaya poso Aye wapana mukumbu, ako ko kutambula kijilo, kushilang’ena ne Nkambo. Bino, jishinda jabaya ja kushilang’enamo, ke kuswang’ana, wafwainwa kuswang’ana pa bintu bimo. Pano, kabiji ke kyenyei kyakuuba mba bimye bimo tutambula byobyoy bintu . . .

<sup>50</sup> Kuja nako kujitu mujishinda jimo. Pano, mwatola bantu basulu, inge bakeba kulenga lumvwang’ano lwa busulu, betapo muntu umo ku kajo ka mulajilo. Kabiji panyuma kwikala ne kuja, bino apa ke kushilang’ana umo ne mukwabo. Mupotenshi wawama, kimye kyonse kechi wisamba na muntu kwakubula kuja ne. Kikala kyawama kupembelela watatula kumvwa bulongo, kabiji panyuma ya kwikala na kajo kakwiaula. Kechi wafwainwa kuyako na kumufumya mu mwanya ne kumubuula kintu kimo kyo wafwainwa kupotesha ne, pakuuba pembelelaji aje kajo kanji ka kwiaula ne—ne kwikala bulongo.

<sup>51</sup> Juba jikwabo, kusapwila pa mwanamukazhi waomvwele mauulu akwa Yesu, akwa ku Canada Naambilenga kikye, kwamba mba inge mwenyei wayiia na kupepulapo muntu mukwabo, awe muntu uji na ndoonda ya bintu byakupitamo kasa bakyangye kwikala bafikilamo kwiiya na kupepula ne, nangwa, kushilang’ena. Lupepu ke kushilang’ena. Pano, bafwainwa kufika ku . . . Waitwa, patanshi waichilwe. Apa bino po wafwainwa kwiya ku kibelo kabiji wamwingilo wafwainwa komvwa ku mauulu obe, mambo a kwenda, uji na bwema bwa—bwa banyama ne bintutu bikwabo bitanwa mujishinda. Bonse . . . bantu baenda mujishindatu jimo na nyama, kabiji—kabiji kwanukilenga ne lukungu, kabiji kimvwalo kya kina Palasitaini kyasenda ne kwikala ku masulwila a kumauulu, kabiji ne kilungi kyabula kumvwetwa, ne—ne ku maboko. Kabiji—kabiji bakonsha kwibakwachila pa kibelo, wamingilo wafwainwa, kabiji ne komvwa mauulu abo. Kabiji nanchi muntu mukwabo waimene byobyoy na taulo ne—ne manyi anuka, kabiji bafwainwa kunsansa ao manyi anuka ku maboko, ne kwishiinga musango *yuwe*, kabiji—kabiji ne kunshitaula ku meso abo, apa bino ke kuntoola taulo ne kwipukuta abo bene. Akya kifumyapo ndochi yonse ne bweema. Kabiji kyafwainwa kwikala na kintu kimo kipana mwela wawama, nobe binuka, ne kwibalengela baumvwa bulongo.

<sup>52</sup> Apa bino inge batwela mukachi, kechi na sapatoy yakala yandochi ne, aya nkwabilo yawama, yaikalanga na tucheche, iji

nobe makapakapa aacheche a mu nzubo, kabiji ipo po batwela mukachi. Kabiji pano awa—awa mwenyi utwela mukachi ne—ne mwina nzubo u—u mutambulwila nakumufyopa. Kabiji, monai, kechi wafwainwa kutemwa mwina nzubo ku kufyopa inge uji na bwema bwatama ne. Obewa kechi wakonsha kutemwa kwenda pa kapeti wa booya kasa uji na ndochi ne. Kabiji apa bino mwina nzubo ukutambulwila na kukufyopa, kabiji obewa wikalatu nobe umo wa muyoya nzubo.

<sup>53</sup> Kabiji, pano, Lesa uji na byobya bintu. Kasa tukyangye kwiningezha kushilang'ena na Lesa ne, twafwainwa komvwewa na meema a Kyambo. Lwaabano, meema a lwaabano etwabanya na ubi bwetu. Pano, kitanshi, kechi wakonsha kwamba na Lesa ne kabiji kechi wakonsha kwikala na lumvwang'ano na Lesa ne, kabiji kuji. . . Kitanshi, wafwainwa kulapila ku kyo wauba, mambo kechi wakonsha kuketekela bulongo ne kanatu walapila, "Nkambo, ndekelaiko mambo pa kubula lwitabilo." Mwamona? "Ndekelaiko mambo pakubula lwitabilo." Mwafwainwa kulapila, patanshi. Kabiji, umvwe walapila, obewa pano uji. . . ubi bobo bwakala bwalekelwa, apo bino obewa wafikilamo kubatizhiwa. Pano, nanchi Aye walaile Mupashi Wazhila, panyuma ya lubatizhilo.

<sup>54</sup> Pano, kine kintu ke, kuuba mba, pa kukwe kushilang'ana, twataana kuuba mba akwa kwajinga—kowa- kumaulu ne bintu byatalang'ana na kyokyo, ne apo, komvwa ku maulu etu, ke kintu kyaimenako kutokeshiwa kwa Mupashi Wazhila.

<sup>55</sup> Nanchi, pano, kwafwainwa kwikala lumvwang'ano lumo. Inge obewa wapusenamo na—na wakatambulwila, nanchi obewa—obewa kechi wafwainwa kushilang'ana ne. Ine, anweba—anweba kuuba mwikyuba ne, mambo obewa ubena kupachika nanji. Pakuuba umvwe mubena kuyiila mumo, nanchi mwakonsha kushilang'ena pamo. Nanchi abyobyoby kiji umvwe twafika ku tebulu wa Nkambo, twafwainwa kuswang'ana na Kyambo Kyanji. Mwamona? Twafwainwa kusemwa jibiji, Mupashi wakwa Lesa mwi atweba kasa abena kwamba mba "amena" ku Kyambo kyonse Aye kyo anemba, nanchi twakonsha kwikala na lumvwang'ano Nanji.

<sup>56</sup> Akye tuji nakyoya kwa Lesa, inge michima yetu yabula kwituzhachisha ne, nanchi twatalwa bulongo kwi Lesa. Twayuka mba tutambula bya kukabila byetu kabiji ne milombelo yetu, ke mambo akuuba mba michima yetu kechi ituzhachisha ne. Pano, inge Lesa witubuula mba twafwainwa kusemwa jibiji, kabiji twabula kutambula kusemwa kupya ne, apo kechi tukomvwa bulongo ne pakuuba mba tuyengatu kulutwe, na kumwipuzha Aye kiji kyonse, monai, mambo twayuka mba kechi twafikizha byo etukebela Aye ne. Kintutu ke mulombelo wa ndengamambo. Bino twaamba Nanji kimye kyo tuji mu lumvwang'ano lwabupopweshi Nanji, akyo kileta kijilo.

<sup>57</sup> Pano, akye kyalumbulula mba kijilo, Amiwa nakonsha kulondolola pa kakimye kacheche. Pano, twatola, kyo tutela mba *kijilo*, ye shinkwa ne waini. Pano, akye kyalondolwelwa mujishinda jingi kyakuuba mba kechi wakonsha kwambapo pa kikye ne. Oo, byo kyatwalwa mungi pa myaka yavula yapita kunyuma! Akyo kine kechi ke kijilo ne, akyo ke kulamatu mukambizho. Mwamona? Pano, ene mambo o twikitelela mba kijilo, mambo akuuba mba kyafuma ku kipamo kya ba Katolika kya kwikala “Yukalisiti Wazhila, ao uji mwine mubiji wa Nkambo Yesu.” Bino kechi ke mubiji wakwa Nkambo Yesu ne! Kijitu mu kuvuluka mubiji Wanji.

<sup>58</sup> Amiwa kechi nasakamana ne nangwa mapulisiti bavula nangwa basapwishi, nangwa yense wakonsha kupesha kyokyo, kikijitu shinkwa ne waini. Kechi kujipo pulisiti nobe byo tubena...be tubuula, amba, “Lesu wafwainwa kuteleka kwi pulisiti umvwe waalula kijilo,” kyo batela mba kijilo, “Yukalisiti, kumwalula ke mwine mubiji wa Nkambo Yesu. Nanchi waitabila watola kyokya, kabiji mba kijilo.” Akyo kyatama!

<sup>59</sup> *Kushilang’ana* ke “kwambang’ana, kushilang’ana, ke kintu kyo wafwainwa kwambako ne akyo kyaamba kwi obewa.” Ako ke kushilang’ana. Wafa kechi wakonsha kwamba kwi obewa ne. Nanchi, kine, kijilo ke Mupashi Wazhila ubena kukumbula. Inge wamwipuzha Aye, ne Aye wamba kwi obewa, akyo kyo kijilo kyaitabilwa. *Akye* ke kivuluko, ke kusenda...kya kupopwa Kwanji ne lusanguko Lwanji, kabiji kechi ke kijilo ne. Twikitela byobyoyo, bino kechi byo kiji ne. Kyafumine mu kipwilo kya Katolika, na kutola yuwe wafa nobe byo twapichilemo juba jikwabo, pa kwamba pa *Butunshi Kwimeena Bwinakilishitu*.

<sup>60</sup> “Amba aka ka wafa kazhinguluka kakacheche ye mubiji wa Kilishitu.” Pano, kipwilo kya Katolika kya ketekela kyokyo. Bushe mwamona, pa kupita kipwilo, be kilang’anya abo bene, bepa bisochi byabo, kabiji ne bikwabotu? Kechi ke kipwilo ne, ke wafa uji momwa mukachi, “awa mubiji pulisiti ye aalula kufuma mu wafa kwikala ke mubiji wa Kilishitu,” awo bapuku ne bakoswe bakonsha kumusenda ne kumutwala. Kika, kechi byo muji ne, kechi ndangulukilo ya itabilwa ne kabiji kulanguluka mba akya kibese kya shinkwa kyaikala mubiji wa Nkambo Yesu! Kuuba kyaikala byobyoyo ne.

<sup>61</sup> *Kijilo* ke “kwamba, kabiji kwamba kwi obewa, kintu kimo kyo mwakonsha kwambanakyo.” Akya kyonka kyambo kya *kushilang’ana* kyalumbulula mba “kwambang’ana,” nangwa, “kwikala mulumvwang’ano na kintu kyamba kwi obewa.” Kabiji Lesu wamba kwi obewa, kijilo. Kabiji kikijitu shinkwa ne waini, ye tutela mba *kijilo*.

<sup>62</sup> Pano, Yesu waambile papo, byo Mbena kutanga, “Mubiji wami ke nyama ne byakutoma, Mashi Ami, mubiji ne Mashi ke

kajo ne byakutoma.”

<sup>63</sup> Pano, twakeba kulanguluka pe Yesu kabiji ne Aye kumukwatakanya, byonka byo Ajinga. Mubiji Wanji ye muka? Mubiji wakwa Kilishitu ye muka? Ke mubiji wa baitabila awo wakwatakana Nanji mu Mupashi Wazhila. Kechi kilubi ne, kechi kibese kya shinkwa ne, pakuuba ye Mupashi uji mu muchima wa waitabila, kabiji ba kwatakana pamo, kya kuuba mba umvwe muntu ne Lesa bakonsha kwamba ku umo ne mukwabo, baana babalume ne babakazhi bakwa Lesa. Muntu mumi, monka mukusumisha Mashi mwaletele lulekelo lwa mambo, kabiji awe mwanamulume ne yuwe mwanamukazhi, nsongwalume nangwa nsongwakazhi, uji na lumvwang’ano lumo ne Kilishitu, ubena kushilang’ana Nanji, mubiji.

<sup>64</sup> Nobe mulume ne mukazhi byo bakonsha kwikala panshi ne kwisamba pa kikye, nangwa nsongwalume ne mulunda nanji nsongwakazhi, Kilishitu ne Kipwilo Kyanji babena kushilang’ena pamo. Ao oene mambo otwafwainwa kumvwa kwi Aye, ne kumona kulutwe kasa kukyangye kufika potuji ne, kabiji wakonsha kubulang’ana lutwe lwalumbuluka, mambo akuuba mba tushilang’ana na Lesa Awo uji na Peenape mu kuboko Kwanji. Kushilang’ana umo ne mukwabo, ye Mubiji wa Kilishitu, wafyamika, Mubiji wa bumupashi wa Kilishitu. Kechi walamatako ku kilubi kiji kyonse ne, nangwa shinkwa nangwa—waini ne, pakuuba mu—mu musango wa bumupashi.

<sup>65</sup> Pano, Yesu waambile kintutu kimo. Mwatola Yoano Wazhila, kyapitala kyabu 4, waambilenga ku mwanamukazhi pa mushima, wamukazhi waambilenga pa kintu kiji nobe mba, “Bashakulu betu bantomenenga ku iye nsulo, kabiji bampoile yuwe mushima, Yakoba, kabiji—kabiji wapaine ku baana banji ne bang’ombe banji aao meema, kabiji Anweba mwamba mba, ‘Kumpopwela mu *umo* muzhi,’ kabiji ne bakwabo bamba mba, ‘Mu yuwe mutumba.’”

<sup>66</sup> Yesu nobe—nobe byonka byo aambile, “Pa mineti umotu! Atweba twi Bayudeya, kabiji twayuka byo kyalumbulula, bupopweshi byo bwalumbulula. Bino telekai ku yuwe, mwanamukazhi. Kimye kibena kwiya, kabiji ne pano kyafika, kuuba mba bapopweshi ba kine bakapopwela Lesa mu Mupashi ne mu Bukine. ‘Kyambo Kyenu bo Bukine.’ Kabiji Bataata bakeba mba aabo bamupopwele Aye mu Mupashi ne mu Kyambo, bo Bukine. ‘Kyambo Kyenu bo Bukine.’” Pano, Aye waambijile yewa mwanamukazhi.

<sup>67</sup> Monai, Kilishitu. . . Lesa ye Mupashi. *Kilishitu* kyalumbulula mba “washingwa manyi, muntu washingwa manyi na Lesa,” akyo kyamulengela Aye kwikala Kilishitu. Pano, Kilishitu waambile mba, “Amiwa ne Kanjo ne Byakutoma.” Kechi kawafa ne, kechi kawafa nkotuja kuno ne. Awa kechi ye Kilishitu ne. Awa waini ye tuntoma ku kitapisho, kechi

ye Kilishitu ne. Kyaimenako Aye, mu jishinda jimo. Pakuuba Kilishitu ye Mupashi Wazhila, kushingwa manyi kuji pa Kipwilo, ko Kajo ne Byakutoma.

<sup>68</sup> Kujila kukatampe kuji mu kyaalo kyonse, Naketekela mba kafwako nangwa umo wikumvwapo ne, bino, inge mwikumvwa, kechi kujipo kujila kwaesakana pamo na kujila kwa zala ne. Inge mwamona inanzi uji na mwaana, kabiji kechi wakonsha kwenda ne wakokelela, kabiji mwaana mucheche ubena kufwa, ne jivumo jaji javimba na mambo a nzala, na kumvwa kujila kubena kufuma mu muchima wa bainanzi, monai yewa mwaana uji na mabuta atwela mukachi poso byaikalatu ke kikoba ne bikupa, ne bishinshinya byako bya bicheche ke bibembeletu, kabiji kechi wakonsha kuuba kyongo ne, nangwa pachechetu ne, meso anji a acheche alusuka. Kechi kujipo kujila kuji pamo nobe kwa zala ne kwa kilaka ne.

<sup>69</sup> Amwa mu biselebwa, baanga bantu bataya bumi bwabo na mambo a kilaka! Mashimikila avula, o Nakonsha kwimulama bufuku bonse, na mashimikila akine atanwa mu kiselebwa. Kyakuuba mba inge waumvwa...wafwa kilaka, diabola wakupa ne ki—kilola. Anweba mwi bimona kuno, kechi kikebewa kuya ku Muzhika pakuuba mba wibimone ne. Yanga mu mukwakwa, kabiji kimweka nobe muji meema mu mukwakwa. Anweba bonse mwibimona, aba bendesha mu mikwakwa yabaya. Abya ke bilola bya bubela. Kuno kimye kimo kunyuma, pepi nobe myaka fiili nangwa foolo yapitapo, Natangile ako mambata amo, atumbukilenga kukilang'anya kyaalo, amwene kilola a ponena ne mu mukwakwa, alangulukilenga mba asakufikila pa meema. Kabiji avingaikiletu, afikijile pa mukwakwa pakonsa, alangulukilenga mba asa kufikila mu meema, ke kilola.

<sup>70</sup> Bimye binga diabola byo aauga kintu kimo ku bantu, wibapa kilola kya bubela, kwepi, kechi kuji kijipo popa ne, bino ke bukitabila-mbijingatu. Nanchi bantu bavula leelo baji na luketekelo lwa bukitabila-mbijinga, kweseka kulengapo kintu kimo nangwa kufwanyikizha nobe pajipo kintu kimo bino kasa kyabula kwikala byobyoby ne! Kijitu pamo nobe mwanamukazhi mishonale waambile mba wapembejilenga poso waikala washininwa. Kyawaina kuuba kyokyo. Obewa kechi wakonsha kubwela na kwikyeseka jibiji ne. Obewa wikala na jishuko jimo, kabiji watambula Buuku wandonda, nanchi kyafwainwa kuya koka ku kipela.

<sup>71</sup> Kujila kwa zala, telekai, ke kujila kwabaya bingi mambo ke kujila kwakukatazhiwa bingi. Muntu ubena kufwa. Kabiji, oo, inge twafika pa kifulo, inge kino kyaalo kyafwainwa kufika pa kifulo kya kufwa nzala ya kukeba Lesa! Kiji mu kipimo kyatama kyakufwa nzala kukila ne byaalo biji nobe India abyo bibena kufwa nzala ya ku mubiji, kino kyaalo kibena kufwa nzala ya ku mupashi. Bino umvwa wafwa nzala pa kimye kyabaya, kifika



pa kifulo kyakuuba mba obewa kechi wayuka mba wafwa nzala ne.

<sup>72</sup> Kijitu pamo nobe kufwa mashika. Panyuma ya kuya palepa, na kufwa mashika, umvwa bingi mashika, kabiji pakupitapo kimye watatula kumvwa kyuya. Kabiji umvwe wauba, ubena kufwa! Kabiji alo lolukatazho bufuku buno. Bipwilo byaikala biji bingi na mashika poso kefafwe na mashika, kabiji ke balanguluke mba batwakyuya, kupichila mu bumembala, kabiji babena kufwa ku mupashi. Babena kufwa! Ne kwikiyukatu ne. Kyapelako, aye ulala panshi mutulo, kabiji ayo yo mpelo ya byonse. Aye kechi ubukapo jikwabo ne, mambo mashi anji achimba mu mishipeshipe.

<sup>73</sup> Pano, kumvwa kilaka. Yesu waambile mba, “Mashi Ami ke byakutoma byakine.” Inge wafwa kilaka kya Bumi, wafwa nzala ya Bumi, Yesu ye ujitu na meema afwainwa kupwisha kilaka. “Iyai kwi Amiwa, anweba bonse mwasulwila ne kunemenwa na mingilo.” Monka mu Lumwekesho, kyaambiwa mba, “Lekai aye uji na kilaka eye ku nsulo ya meema a Bumi kabiji ne kutoma kyatutu.” Inge uji na kilaka kya Bumi!

<sup>74</sup> Twamona mba bapalanguzha bya mulwelele babena kwambila jimo, kimye kimo mu lubaji lutanshi nangwa lubaji lutanshi lwa ng’ondo, kutatwila pa jabubiji nangwa ja butanu nangwa monka mukachi ka ng’ondo, ma asitolonoma abena India baambila jimo amba kyaalo kikabana bipimvwa bipimvwa. Kabiji mapepala a byambo a mu America ekyubila bisela. Amiwa kechi naketekela mba kyaalo kikalajika bipimvwa bipimvwa, bino Naamba mba ke kintu kyatama kwikiletela bisela. Mambo, kintu kimo kibena kuya na kumweka mu juba jimo jibena kwiya, kintu kimo kipashako ku kyokyo, umvwe byaalo faivi, Mars, Yupita ne Venus, ne—ne bikwabotu, byaiya mwabo—mwabo. . . Kikyangye kubiwapo ne. Oo, baamba mba kapepo myaka tweti-faivi sauzande yapita, bino wajingako kunyuma kokwa amba ekiyuke ng’anyi?

<sup>75</sup> Naambila jimo amba akye kiji na kilumbululo kya bu mupashi. Naketekela mba akye ke kwiya kwa Lesa, amba lumwekesho lukatampe lwa Kyambo lukashikulwa mu kyoka kye kimye. Vulukai, bamba mba tubaangabanga tusatu twaishile mu bifulo byato kimye Yesu kyo asemekelwe. Kabiji atwe tuji faivi, kabiji faivi ke bupe, nambala ya lusa. Fiili kd nambala ya kulumbuluka. Faivi ke nambala ya lusa, Y-e-s-u, l-u-s-a, l-w-i-t-a-b-i-l-o, ne bikwabotu. Nambala ya lusa! Lesa utuma bulume Bwanji ku kipwilo, kikekala ke lusa Lwanji, kechi kikekala ke lukokelo lwa bantu ne. Kabiji Isaya waambile mba, mu kyapitala kya bu 40, bya “kujila ku Yelusalema, amba bya makondo anji byapwa,” nangwa byonkabyo wazhichilwe na kupopwela tulubi, bino kyajinga lusa lwa kwa Lesa lwa tuminenga kyokyo. Lesa utuma kintu kiji kyonse kwi atweba, kikekala ke lusa Lwanji kabiji kechi kyakufikilamo atweba bene ne. Nanchi,

kyakonsha kulumbululapo kintu kimo. Naambila jimo amba kukekala lupipu lwa bintu. Amiwa kechi nayuka byo kikekala ne, bino Naketekela mba kyakonsha kumweka. Tuji pa . . . ponka pano tuji pene pa kipela.

<sup>76</sup> Kabiji inge muntu yense wafwa nzala, mulekai eye kwi Kilishitu. Inge muntu uji na kilaka, mulekai aye eye kwi Kilishitu. Aye upwisha kilaka. Aye Upwisha byonse bya kilaka kyetu ne nzala.

<sup>77</sup> Najinga na jishimikila jobambujile kimye kyapita kunyuma. Kapepo ne jibulang'ana mu kino kipwilo. Inge Nekyuba, mwafwainwa kundekelako mambo pa kwijibwezhapo bino kisakwikalatu pa bikomo. Kwajinga tangi wa kina India, nangwa, nobe mukulumpe wabena Indian. Aye wayiilenga mu kyaalo kyabena Navajo, kabiji wajinga, walubilamo. Jizhina janji jajinga Coy. Kabiji wayiilenga mwaya mukwala, mukwala wa banyama, kabiji walangulukile mba, "Pano, inge Nafika muyuwe mukwala, kine Nakonsha kutana meema." Kabiji mbili wanji wajinga wafwa bingi kilaka kyakuuba mba ne lujimi wanji walupukile mukanwa, wauma, mu myoona wamwekelenga kuchila ne kupilwa na busenga. Aye wawachile katambala kanji pa kilungi kyanji mu kipupu kya busenga na kupiilwa, kabiji aye wawwilenga, na mambo a meema. Kabiji watangijilenga mbili wanji byo afikile mu mukwala. Kabiji aye waambile, byo akajijile pa mbili wamwene yuwe mukwala wa banyama, ne kwamba mba, "Kine usakutwala ku meema." Nanchi aye wakilukijile ne-nekwikala pa mbili wanji ne kutatula kuya mwaya mukwala.

<sup>78</sup> Kabiji ne mbili naye wayukile ne aye mba uji mu mukwala wakuya ku meema. Lesa Byo apana buyuke ku banyama babula kwamba! Kabiji monka mu mukwala mu ayiilenga. Pakuppezhako, pachechetu waasenduka kulubaji lumo, pakuya kulutwe pacheche mu jishinda ja sebewamo. Mbili wakebelenga kwalulukila mujoja jishinda, pakuuba aye Coy walangulukijile mungi. Aye waesekele ku mulamina mwine mu mukwala mukatampe, kabiji aye watatwile kuya bino mbili aye kechi wayiile ne. Wamupumine, kabiji watamine muteto ne kutatula kuya mujishinda jikwabo. Watatwile kuya panshi. Wajinga wakookelela bingi pakuuba mba amwikizhepo.

<sup>79</sup> Nanchi watatwile kundoonsa tambo yanji jibiji, poso byo achibile mbili, na kisangajimbwe kya kukeba meema, bumi bwanji byo bwapulukile, ne mbili byo aimene, kasa azakama, ne kusuuma mashi. Kabiji aye watajile panshi, watajile panshi kokwa, kabiji wazakaminenga *byobya* kabiji pepitu kuponena ponka po aaji. Aye watajile panshi pe aye, kabiji wamwene mashi ku lubaji lwanji. Aye wajinga Mwinakilishitu. Kabiji aye waambile ku mbili wanji, waambile mba, "Amiwa bimye byavula ng'umvwa ba mungye. . . nangwa, binyama byumi biji na kitemwa kyabyo. Kechi kyamwekelenga nobe aja jicheche

jatala kungi jafwainwa kuya ku meema ne. Kyamweka nobe aje jishinda jikatampe jafwainwa kutangijila kuya ku meema koobaya kimye kyonse, bino,” waambile mba, “inge wasenda amiwa na bukishika kufika pano, Amiwa nkalondela mwayila ndoonda ya kisemwa kyobe.”

<sup>80</sup> Oo, byo Ndanguluka pa kyokyo pe Kilishitu! Jishinda ja kuya ku lonaiko ja yukanyikwa ne kuwama jonsetu, pakuuba kuji jishinda ja jicheche jitwala ku Bumi. Bacheche bo Bakejitana. Boobokatu, kechi mwayila kisemwa ne, pakuuba Mupashi Wazhila ukakwalulwila ku lubaji lwa meema a Bumi. Nalanguluka mba, Jandeta kufika pano mpoji, Amiwa Kejisenda lwendu lwami lonse.

<sup>81</sup> Pa kupwisha jishimikila, aye—aye kechi wayiile kufika pa afu mailoshi ne, poso, ponkapo, mbili wakishika wasolomokeyile mukimbo kikatampe kya meema. Mbili wayukile kyo aambilengapo, byo kyalumbulwilenga pa kwikilondolola ku—ku ye asendele. Aye wafikile popa. Aye waambile mba wataile meema ku myona ya mbili. Aye mwine waowele, aye wabijikile ne kuuba kyongo, kabiji wabijikilenga na jiwi jikatampe, kabiji ne kwitulwilwa meema pa kikolomeno kyanji, ne kubijika mba, “Twapuluka! Twapuluka! Twapuluka!” Kabiji ne mbili, watomenenga, na kuzakama. Kabiji watajile ku lubaji lwa mashi, kabiji waomvwelwe ku mikakamba ya kamama.

<sup>82</sup> Kabiji waambile ponkapotu, aye waambile mba... waumvwine muntu umo amba, “Fumamo mu meema.” Kabiji watajile, kwajinga mucheche walubaka kilungi waimene popa usopa bang’ombe. Kabiji wafuminemo mu meema. Aye waambile mba naumvwa bweema bwa mujilo, kabiji watajile konka, kwajingan jibumba ja bantu babikile nkambi konkakwa. Bajinga konkwa na mwingilo wa bulukokaula. Abo bataine golode, kabiji pa kubwela mujishinda bajinga na bambili baabo ne bisendwa byo bajinganabyo, kabiji nabo baishile ku kikye kimbo kya meema kabiji bakokolokelenga, kabiji bonse bantomene.

<sup>83</sup> Kabiji batekelenga nyama, ne kuja wajile nabo. Kabiji waambile, umo mwi abo waambile mba, “Ntola utome.” Aye wibabujile jizhina njanji, aye wajinga Jack Coy, mwi—mwina India utangijila. Nanchi aye waambile mba, “Kyawama, pano, tolai bya kutoma.”

Aye waambile mba, “Ine,” waambile mba, “Amiwa kechi ntoma ne.”

<sup>84</sup> Kabiji akyo kiji nobe mwenga kubooba bantu. Nanchi aye waambile mba, “Obewa tambula bya kutoma kufuma kwi atweba!”

Aye waambile mba, “Ine, Amiwa kechi toma ne.”

85 Nanchi aye watayiile komoki peulu, ne kwamba mba, “Tola bya kutoma!” Watomene, byonsetu, mwayukatu, pepi nobe afu wadazeni.

Kabiji nanchi aye waambile mba, “Nemusachila anweba, bansongwalume.”

86 Waambile mba, “Inge myama yetu ya wamisha kuja, wisiki wetu naye wawama kutoma.”

87 Kabiji mwayuka byo baji, bapendwa. Kabiji aye waambile mba, “Ine,” byo aambile.

88 Kabiji babikilemo lupolopolo mu laifo, ne kwamba mba, “Pano utome inge ne!”

89 Aye waambile mba, “Ine. Ine, Amiwa kechi katoma ne.” Kabiji watatwile kumwajika laifo. Waambile mba, “Pa kakimye kachechetu.” Waambile mba, “Amiwa kechi nji na moyo wa kufwa ne.” Aye waambile mba, “Amiwa—Amiwa kechi njipo na moyo wa kufwa ne.” Aye waambile mba, “Bino Na—Nasaka kwimubuula jishimikila jami kasa Kyangye kwi kyuba, ene mambo Amiwa kyombujila kutoma.” Waambile mba, “Amiwa ne mwina Kentucky.” Aye waambile mba, “Kabiji mukacheche kanzubo kalepuluka lukeelo lumo, amo bainanji mo balajile na kufwa, bangichile kulubaji lwa mwanya, kabiji waambile mba, ‘Jack, bashobe bafwile na mulumba wa ngyuka mu kuboko kwanji, kubushiya bwa tebulu, bapendwa.’ Kabiji waambile mba, ‘Kechi ukatome ne, Jack, kyonse kyo uba.’” Kabiji waambile mba, “Pa kokola ya bamaama’ po Nabikile maboko ami. Kabiji Amiwa nalaile Lesa, nobe nsongwalume mucheche wa-myaka-teeni, Amiwa kechi kasenda byakutoma byami kutanshi ne.” Aye waambile mba, “Amiwa kechi nekitomapo ne.” Kabiji waambile mba, “Pano inge ubena kukeba kundooza, obewa lozatu.”

90 Kabiji ponkapo kitomi byo asutwile laifo wanji ne kutaya jibiji komoki, waambile mba, “Tola utome nangwa ne Nsakuloza!” Kabiji ponkapo buta bwalozekele ne komoki yansansaukile.

91 Waimene ku lubaji lwa mutumba kwajinga usopa bang’ombe mucheche, watamisha kilungi kyanji, mipolo ya kunkulukilenga pa mabuta anji. Aye waambile mba, “Jack, ne Amiwa nafuma ku Kentucky. Nalaile mulaye ku bamaama juba jimo, bino Nazhilulwile mulaye wami.” Aye waambile mba, “Amiwa napembejilenga poso babo bantu batoma kyabaya, kabiji nafwainwa kwipaya jibumba jonse jaabo, nangwa byonkabyo, tolai golode ye baji nanji.” Aye waambile mba, “Bino Amiwa napendwa kabiji Nauba kilubo. Bino,” waambile mba, “Naketekela mba buta bwami byo bwaubile kikuwila kupita Mwiulu, bamaama bang’umvwine amiwa kufwachika lulayang’ano amba Amiwa kechi ke kyubapo jibiji ne.” Kabiji

kokwa, monka mu bupe bwa Lesa, aye wibatangijile aba bantu bonse kwi Kilishitu, bonse bajingako.

<sup>92</sup> Monai, pajipo kintu kimo pa meema, kintu kimo kya kubwezhamo ngovu. Kikomo kyami ke kino, kuya ku meema umvwe uji na kilaka. Pajipo kintu kimo kyubiwa kwi obewa, ke kuya ku meema inge uji na kilaka.

<sup>93</sup> Pano, Aye waambile mba, “Mutende wami Nashila anweba. Mutende wami Napana kwi anweba.” Kechi nobe ntanda byo ipana mutende ne, pakuuba mujishinda Aye jo emupelamo mutende. Wanji mutende upwisha kilaka. Inge tubena kukabila mutende, pano twayai tusanguluke mu mutende Wanji, kuyuka mba tuji na mutende na Lesa kupichila mwi Nkambo yetu Yesu Kilishitu. Aye ye Upana-mutende wetu upwisha kilaka kyetu.

<sup>94</sup> Veeleshi waamba mba Ako ko Kajo ka kine ne bya Kutoma byakine. Amiwa njina kiyukilo kicheche papo, veeleshi wabu 57, “Kajo ka kine ne bya Kutoma byakine.” Telekai byo Aambile papo.

*Kabiji byonka byo batuma Bataata ba bumi, ne Amiwa mbenakumwena bumi monka Mwi Bataata: byonkabi awa unja amiwa, ne aye ukamwena bumi monka mwi amiwa.*

<sup>95</sup> Mu byambo bikwabo, “Ba Taata batuminye Amiwa, kabiji Amiwa ngikala monka mwi Aye. Kabiji muntu yense wiya kwi Kilishitu wafwainwa kwikala monka mwi Kilishitu.” Oo, ami, abyo byokiji, akyo kyo kijilo. Akyo kyo kijilo kya kine kyo mutana inge mwaikala mwi Kilishitu.

<sup>96</sup> Pano, mibiji yetu ikeba kajo ne bya kutoma pajuba pajuba, pa kwikala na bumi, ku mubiji wetu. Inge twabula kuja kajo pajuba pajuba ne bya kutoma, nanchi mubiji wetu unekena. Mujipo kintu kimo mwi atweba kyakuuba mba twafwainwa kwikala na kajo. Kajo ka juba jimo kechi kakafika ku juba jikwabo jalondelapo ne. Wafwainwa kwikala na kajo pajuba pajuba, mu kupana bukose ku mubiji. Wakonsha kwikala na bumi, bino wikala wakokelela. Kabiji juba jalondelapo, ukijitu wakokelela. Kabiji juba ja busatu, wikala wakoka bingi.

<sup>97</sup> Kyawama, abyo byo kyubiwa bimye byavula mu kibese kya bumupashi. Mwamona, pajuba pajuba twafwainwa kwikala bakushilang’ana ne Kilishitu. Twafwainwa kwimba kwi Aye pajuba pajuba. Twafwainwa kwi kikajika ne Aye pajuba pajuba. Paulo waambile mba, “Amiwa mfwa pajuba pajuba.” Mwamona? “Pajuba pajuba, Amiwa mfwa; nangwa byonkabyo Ngikala na bumi, kechi amiwa ne kanatu Kilishitu wikala mwi amiwa.” Nanchi, inge mubiji obe ukukebewa kanjo pajuba pajuba ne byakutoma pajuba pajuba, pakuuba mba wikale na bumi, mubiji obe wa bumupashi ukeba Kajo ka bumupashi ne kushilang’ana ne Nkambo pajuba pajuba, pakuuba mba wikale na bumi. Ee. Yesu waambile mba, “Muntu kechi ukekela kukajo

konka ne, kana ku Kyambo kyonse kifuma mukanwa kakwa Lesa.” Nanchi, pajuba pajuba twafwainwa kufunda Baibolo. Bantu bamo kechi Bamufunda nangwa pachechetu ne. Bamo Bamutola jibiji nangwa bimye bisatu mu mwaka umo. Bino, wakine, waitabila kine washimikwa ku bumupashi, utanga Baibolo wanji pajuba pajuba, ne kwamba kwi Nkambo. Abyo ibyo. [Kafwapo bijipo pa tepu ne—Waku.] Aye wafwainwa. “Muntu kechi ukekela ku kajo konka ne, kana ku Kyambo kyonse kifuma mukanwa kakwa Lesa.”

<sup>98</sup> Pano, kintu kikwabo kyo tujiila kajo, ke kushimika mubiji wetu pakuuba mba tushinde bikola. Inge wabula kuja kajo, ne kuleka mubiji obe wakokelela, nanchi ukatwelelelwa ku bikola. Bikola bikatwela mu mishipeshipe ya mashi, ne obewa nishi waya. Inge mashi obe kechi aikala bulongo ne kutoka ne, kyawama, nanchi akekala, bikola bikatwela mu mishipeshipe ya mashi. Nanchi wafwainwa kuja kajo kawama pakuuba mba ulame bulongo kwenda kwa mashi. Inge wabula kuuba, obewa ukekala walukuka ku bikola. Alo lo lwine lukatazho na Benakilishitu bavula.

<sup>99</sup> Kijitu pamo nobe bijimwa bikomena mu manzubo abijimwa. Mwayukatu, mwafumya kijimwa mu nzubo ya bijimwa, wafwainwa kwikilamawizha. Akyo kechi kyayuka ng’endelo ya lubesha ne. Akyo kechi kyayuka kusaama kwa juba ne bintu bikwabo ne, kyamvwetwa kyonse ne kulamwa nobe lukeke. Kabiji alo lo lukatazho na bavula batelwa-mba Benakilishitu, ke manzubo abijimwa. Abyo ibyo, kikala kyalukukwa ku kyonse kilongolo kiiya! Mwayukatu, kijitu ke—ke. . . Kijitu ke—ke bijimwa byanekena byo byafwainwa kunsaswa, nangwa, bijimwa byakumvwangakanya.

<sup>100</sup> Mwayukatu, mwasenda musango wang’ombe wa Hereford ne kumuleka waya na kuja munyevu, kabiji ukaluka walepa masengo konkakwa, awa walepa nsengo wakonsha kubwela aye mwine mambo uji na kitemwa kya kinsho. Pakuuba mwasenda Brangus nangwa Hereford ye bamvwangakanya lusemo, wikala ng’ombe umweka bulongo, kine, wanuna ne bumi bwawama, bino abo mwibaleka, kechi bakonsha kubwela ko bafuma ne. Abo bakafwa! Abo bafwainwa kwibalamawizha nobe bulukeke. Mwamona?

<sup>101</sup> Kabiji alo lolukatazho lujiko leelo, tuji na Benakilishitu bamvwala-bulongo, bipwilo bikatampe, kabiji byavula bya—bya kufunda, masukuulu a mamboawama, bino abo kimye kyonse kwikala kwibalama nobe baana balukeke, obwa wafwainwa kumona mu ngalashi abo inge ne kechi wakonsha kwibamona nangwa pachechetu ne. Bo tubena kukeba ke Benakilishitu bapya bulongo, bonse pamo mushi ya Mashi a kwa Nkambo Yesu, aba babula kwikela ku mafunjisho a kipwilo ne, kanatu afuma mu Kyambo kya Lesa, kijilo pamo ne Kilishitu. Akya Kyambo kibena kwiya mu waitabila, mwanji—mwanji mu mubiji wa

bumupashi washimikwa. Kechi nzubo yabijimwa ya balukeke ne!

<sup>102</sup> Kwajinga wamwingilo umo waji kwamba leelo, Najikumuvwa, wajikwamba pa waileshi, aye wajikwaamba mba, byo aishile mu kyaalo, wajinga na lukatazho lwakupita mashi abaya, kabiji baambilenga pa kumutumbula. Kabiji baambile mba bakoba *kikye* ne *kyokya*, kumuchiba ne kumutumbula, kabiji ne kuchibako lubaji lumo lwa mwikala bongo, akyo kyakonsha kulengela kilungi kyanji kubofokela mukachi, kabiji ne bikwabotu byonkabya. Kabiji waambile mba wajikutomena muchi ku mupaipi. Kyamweka nobe kwajinga muchi wavula wakutoma. Pakuuba byo aishile ku dokotala Mwinakilishitu wawama, dokotala waambile mba, “Twayai tulubeko muchi kabiji tulubeko bya kutumbula, kabiji twayai tushimike mubiji pakuuba mba wakonsha kukana yuwe musongo.” Abyo byokiji!

<sup>103</sup> Ng’anyi lukatazho alo bantu kechi bekala na bumi byonka byo baikalanga kala ne? Tutambula nguya ya *kikye* kabiji nguya ya *kyokya*, kabiji ne kwisansa atweba bene na misango ya michi. Kyuba byepi? Kitulengela atweba kwikala banekena, banuna, mubiji wanekena, kechi kyawama ne. Pakuuba bantu ba mukimye kya kunyuma . . . Kika, mubiji ukatazhiwatu kubiji byonse. Pano babena kutambula bilonda-byonse ne bintu bikwabo.

<sup>104</sup> Amiwa naimana mu Africa, kechi naaswapo nguya ya malelya ne. Bino lubwibwi wa malelya wakonsha kwikala pa kuboko kwami, Nafwainwa kwikala na malelya. Kechi bapanga kyongo ne, kabiji kechi wafwainwa kuyuka nangwa pachechetu ne. Bapana kyeya, batwajijilatu na kupana kyeya, byom kiji, kasa uji nakyo. Inge waikala na bumi, ukekala nakyo pa myaka fiftiini. Kabiji kimye kimo wakonsha kufwa nakyo. Kabiji kwajinga bangikazhi mu tufufu twabo twatucheche, na mbwibwi ku mikupa yabo posepose, kwakubula kumvwalako ne. Mbwibwi kasa yalamachila pe abo, mbwibwi ileta malelya, kabiji kechi ibakatazha ne. Kika? Bashimikwa bukikizhi. Bajinga na muchi-wakwa Lesa.

<sup>105</sup> Kabiji alo lolukatazho lujiko leelo na bantu. Alo lolukatazho na kipwilo. Tuji na manguya a baana avula kabiji ne lufunjisho lwalenga-bantu, poso twasaswa mubiji yense. Kyotubena kukeba ke muchi wakwa Lesa kupichila mu Kyambo kya Nkambo Lesa. Muntu ukekala kimye kyonse na koka Kajo, mu kushimikwa mweo waji mu bukikizhi bwa ku misongo ya kumupashi ibena kuopitang’ana ne kutolauka mwaya kyaalo. Nji na byanembwa byavula pa bibye, bino Amiwa mbena kuleka.

<sup>106</sup> Pano, kushimikwa, kwikala winengezha kunguya. Pano, twikela ku bibye, yetu—yetu mibiji yafwainwa kwikala na bibye. Kabiji, inge twabula nishi tukekala balukukwa na misango yonse ya bikola. Kabiji Kyambo kya Lesa, nobe byonka

byo Twikiketekela kabiji ne Kwikiswa kupichila mu kijilo, “Nkambo, Kyambo Kyenu bo Bukine.”

107 “Kipwilo kyami kyaamba mba kechi wakonsha kusemwa jibiji ne. Baamba mba, ‘Kwiimuna maboko ko kusemwa jibiji.’ Baamba mba, ‘Kusansa.’ Baamba byonse bye bintu, ‘Abyo byokiji, Taata, Mwaana ne Mupashi Wazhila.’” Pakuuba Baibolo waamba mba kubatizhiwa mu Jizhina ja Yesu Kilishitu. Mwamona? Pano, wafwainwa kuya kulutwe na manguya akulenga inge ubena kukeba, wilenga obewa mwine na Bwinakilishitu bwakulenga. Mwamona? Obewa kechi ukeba kyokyo ne.

108 Obewa kechi wakonsha kwikala na Bumi ne, kanatu kupichila mwi Kilishitu. Kabiji pano Kyambo Kyanji kyuba byepi? Kishimika mubiji wetu wa bumupashi, wakosa, byo tubena kushilang’ena Nanji, mu ku mukana diabola.

109 Mwaamba mba, “Mulongo Branham, akyo kyo ubena kwamba mba, ‘kushilang’ena Kyambo Kyanji’?”

110 Ee, Aye ye Kyambo. “Muntendekelo mwajinga Kyambo, ne kyokya Kyambo kyajinga na Lesa, kabiji akya Kyambo kyajinga Lesa. Kabiji akya Kyambo kya alwilwe ke muntu ne kwikala waikelenga muno mwetu.” Kabiji twafwainwa kuja mubiji Wanji. Nanchi mubiji Wanji ke Kyambo Kyanji, mambo Aye ye Kyambo. Kabiji Aye waambile mba, mu Yoano Wazhila 15, “Inge mwaikala mwi Amiwa, ne kijilo Kyami, Kyambo Kyami, kyaikala mwi obewa, apa mino wakonsha kulomba kyonse kyousaka kikakubilwa.” Abyo byokiji. Akyo kyakine. Monai, lombai kyonse kyomukeba!

111 Kika kyomuba? Obewa ubena kushimika mubiji obe ku manguya a . . . Muntu umo waiya ne kwamba mba, “Oo, kipwilo kyetu kechi baketekela mu kubijika ne.” Monai, washimikwa. Kika? Obewa uji na kijilo mwi obewa, Kyambo. Kabiji obewa waaswa nguya kufuma ku kikye. Inge jibumba jabulamo maana jaiya, kyo kika? Kechi kiji na Kyambo mwi akyo ne, nanchi kine kyatama. Amiwa kechi nasakamana ne nangwa kimweke kwikala kyakine byepi, inge kechi Kyambo ne kishe pa bunke bwakyo. Ibyo, kilekaitu buke bwakyo. Amiwa kechi natako muchima byo kyuba ne, kyafwainwa kwesakena pamo na Kyambo!

112 Mu milombelo, nobe byo Najikwambulanga Mikaya waimana popa, talai, kyamwekele bingi bulongo, Isalela kasa akiji ponka, kabiji ne yoya ntanda yajinga yabo. Aba benyi baishile ne kwikisenda kufuma kwi abo ne kushimikamo manzubu abo, kabiji baikele pa lubaji lwa ntanda ayo Lesa yo ebapele. Nanchi kyamwekele nobe booba foolo aduleendi bangauzhi ba Bahebelu bajinga bulongo. Bino, mwayukatu, kwajingapo kintu kimo ne Yeoshafwata kyajinga



kya bumupashi, waambile mba, “Bushe kechi kujipo umo mukwabo nenyi?”

113 Waambile mba, “Amiwa njina mukwabo, bino,” waambile mba, “Namushikwa. Kintutu kyo oba ke kwaula byatama.”

Waambile mba, “Yanga ukamulete kabiji tusa kumumvwa.”

114 Kabiji waile konka, waambile mba, “Yainga, yainga konkakwa, bino Namwene Isalela wapalang’enamo nobe mikoko yabula kafunga.” Kabiji byo abulang’ene kimwesho kyanji.

115 Pano, ng’anyi uji bulongo nyi? Kyamwekele nobe foolo aduleendi bajinga bulongo. Foolo aduleendi bantu bafunjishiwa bulongo, kwaamba mba, “Yainga, aye Nkambo uji nenu.” Kabiji ne Zendekiya wajinga na—na—na—wajinga na... Zendekiya wajinga na masengo abiji ashimikwa. Aye waambile mba, “Kukikye mu kapangamo benyi kufuma muntanda.” Aye kine wajinga washininwa mba uji bulongo. Aye wayukile mba ujitu bulongo. Bino, mwamona, aye wajinga mukilubo.

116 Kabiji kuno, Mikaya, umo na foolo aduleendi, kabiji aye waambile mba, “Inge mwaya, Isalela ukapalang’enamo, kwakubula kafunga.”

117 Kabiji bakwabo baambile mba, “Yaingatu, aye Nkambo uji nenu!” Pano, mwaila ku mubiji, bajingatu bulongo, aya mpuzha yajinga ku lubaji lwa Isalela. Pakuuba Kyambo kya Nkambo kyazhachishe Ahaba, nanchi Lesa wakonsha kupesha byepi kyo Azhachisha?

118 Abyo byokiji leelo. Mwamona? Akyo Kyambo kya kijilo kyajinga mwi Mikaya. Pano, inge mubena kushilang’ena ne Lesa na kuja kijilo kya kine, kabiji mupashi uji mwi obewa wabula kuswa kikyeyo Kyambo, obewa kechi ubena kushilang’ena na Lesa ne, ubena kushilang’ena na badiabola. Kabiji babena kupashang’anyatu! Aye Baibolo waamba mba, “Mu moba akupelako bakajimbaika bonka Basalululwa inge kya konsheka kubiwa. Pakuuba meulu ne ntanda bikapita, pakuuba Kyambo Kyami kechi kikapita ne.” Kabiji inge... Paulo waambile mba, Galatiya 1:8, “Inge malaika wafuma mwiulu wasapwila mamboawama akwabo apusanako na Ao o mwaumvwine kala, ekale wafingwa mafingo.” Nangwatu malaika! Mu kipwilo kitanshi, aba banabalume, nobe Martin Wazhila, Irenaeus, aba banabalume ba bulesa, kimye diabola po afwainwa kumweka nobe malaika wa kyeya. Bino, mwamona, aye ukekala pacheche wafuma mu Kyambo.

119 Aye wamwekele kwi Eva nobe malaika wa kyeya, wamubuujile mba, “Kine, aye Nkambo waambile *kikye*, aye Nkambo waambile *kikye*,” bino aye wapachikile na Lesa kufikatu ne papelo. Kabiji abyokiji kijilo kya bubela byo kyuuba leelo. Umvwe bantu balanguluka mba babena kulomba kwi Lesa, kabiji babula kukokela Kyambo ne, ke kijilo kyabubela.

<sup>120</sup> “Inge mwaikala mwi Amiwa, ne Kyambo Kyami mwi anweba, nanchi ipuzhai kyonse kyomukeba,” monai, “kabiji kikobiwa.” Pano, kechi kyakonsha kwingilatu kimye kimo ne, kyalondelapo kyaya mungi ne. “Anweba mwaikala mwi Amiwa, Byambo Byami byayikala mwi anweba,” ko kuuba mba, ikalai ponkapa. *Ikalai* kyalumbulula mba “kukokolokela ponka, ikalai ponkapa.” Ee, ke—ke nguya yakufuma ku bikola bya bubi.

<sup>121</sup> Pano, lekai pezheko na kwamba kikye kyambo kimo, kasa tukyangye kuya ku tebulu wakijilo ne. Aa Mashi ne Mubiji wa Nkambo, byavwangakana na lwitabilo, ao ke Mashi ne Mubiji, ao ye Mupashi ne Kyambo, kyamvwangakana na lwitabilo, waesakanatu pamo na Bumi Bwapeenape. “Aye uja Mubiji Wami ne kutoma Mashi Ami uji na Bumi Bwapeenape, kabiji Amiwa kamusangula mujuba jikapelako.” Abyo byobyo kiji. Kyokika? Kijilo kya Nkambo. Akyo Kyambo ne Mupashi, abwe Bumi buji mu Mashi, Kyambo ne Mupashi byaesakanatu pamo na Bumi Bwapeenape, koka kulwitabilo mwi Nkambo.

<sup>122</sup> Uno yo milombelo yami, byo Mbena kumona mpelo kasa ibena kwiya, pa mineti uji yense, kintu kimo kyakonsha kumweka, kabiji tuyuke mba kechi tuji kwalepa kufuma pa Kwiya kwa Nkambo ne:

Nkambo, nanchi mu Jizhina ja Nkambo Yesu, Mwaana wakwa Lesa, lekai tole Kyambo, yo Mpoko, ne Kwikepepeza na lwitabilo lo Njinalo, ne kuchibaula mujishinda jami bulume bwa diabola, poso Namona Yesu, monka mukushilang’ena kwa Kyambo Kyanji.

<sup>123</sup> Kushilang’ena na Kyambo Kyanji. “Inge mwaikala mwi Amiwa, ne Kyambo Kyami mwi anweba, nanchi ngipuzhai Amiwa kyonse kyomukeba kabiji kikemubilwa.” Byo kyawama! Kuji kijilo kyakine na Kyambo ne Mupashi, na lwitabilo lwa kwi Kipepeza pamo, “Ipuzhai kyonse kyomukeba, kabiji kikemubilwa.” Twayai tulombe.

<sup>124</sup> Walusa kabiji Wamunema Wazhila Taata Lesa, aye mukatampe NJIPO, Aye El Shaddai, kwi Abulahama. Anweba Lesa, akye kijilo kikatampe kya Nkambo kyaesakana pamo na Bumi bwa Peenape, kabiji Kyakonsha kupwisha bwitote, byo Ipwisha kubula lwitabilo, byo Ifumya ku bubi bwa ino ntanda! Ke kijilo, na butemwe bwa Bulesa bwa Taata Wamwiulu. Kabiji monka mu bololoke bwa Yesu Kilishitu tuji na sambu ku yuwe tebulu. Kabiji twalomba, Nkambo, amba Anweba musakwitupa atweba bonse sambu yakufikako bufuku buno, mu Mupashi. Tulekelaiko mambo. Kabiji tubena kukeba mibiji yetu ya bumupashi ikome. Atweba kechi twatako muchima kwininga ku kipwilo nangwa dinominesheni ne. Tubena kukeba kushimika mubiji wa bumupashi, kwitufumya ku bubi, kwitufikizha pakifulo kyakubula kukabila kuuba kintu kyatama, kabiji apo Mupashi wazhila po akonsha kutola

Kyambo Kyanji Mwine ne byatunwa byetu, ne Kwikyamba mu bututulu nobe byonka byo Kyaambiwe pa joja juba, mambo Ke Mupashi umo wajinga mwi Nkambo Yesu. Nalomba, Taata, amba Anweba musakwitupa kyokyo.

<sup>125</sup> Maawala abena kuya na kupwa. Akyo kimye, kechi twayuka ne, akyo umo wapelako po akapuluka. Bino Nalomba bufuku buno, Nkambo, inge muji booba babula kwimuyuka Anweba kwikala Mupulushi wabo, lekai be mutaane Anweba bufuku buno byo basakwiyanga ku meema a lubatizhilo, nobe kivuluko, kya kushimuna ku yuwe mubiji wa baitabila amba baitabila jishimikila ja kwamba mba Yesu mwina Nazala wasemekelwe ku lusemo lwa kisungu Maliya, kabiji amba waipailwe, wapopelwe kwi Pontasi Pilato, kabiji bamusangwile pajuba jabusatu kwi Lesa, kabiji waikala ku kilujo kya Bufumu Bwanji, bufuku buno, kwakubula kuleka kusashijila ne.

<sup>126</sup> Kiswishai, Nkambo, amba awa muntu umo, pakukokela mikambizho ya Baibolo, “Lapilai, anweba bonse, ne kubatizhiwa mu Jizhina ja Yesu Kilishitu mululekelo lwa mambo enu. Mambo kechi kujipo jizhina jikwabo mushi ya Mwiulu japewa ku bantu mo mwakonsha kupulukila ne.” Anweba Lesa, lekai bantu bamone bukishika bwakyo, kabiji ne Kyambo byo kyaimana kyakosa, “Kechi kujipo jizhina jikwabo mushi ya Mwiulu japewa ku muntu mo mwakonsha kupulukila ne, pakuuba mu Jizhina ja Yesu Kilishitu.” Onkao mambo, mutumwa waambile mba, “Lapilai, anweba bonse ne kubatizhiwa mu Jizhina ja Yesu Kilishitu mululekelo lwa mambo, kabiji mukatambula wabupetu Mupashi Wazhila. Mambo mulaye walailwa ku kila nkulo, ne bonse mo bavujila Nkambo Lesa wetu bo aketa.” Kiswishai, Nkambo, amba kusakwikala lwito lwabaya bufuku buno.

<sup>127</sup> Kabiji kyaambiwa ne akyo, kwi Nkambo yetu, “Kafwako muntu nangwa umo wiya kwi Amiwa ne kanatu Ba Taata bamukoka, kabiji bonse bobapa kwiba Taata bakeya kwi Amiwa. Mikoko yami yumvwa Jiwi Jami.” Mwenyi, kabiji umvwe mwenyi waamba, jiwi jabula ja bukinembelo, bukiji bukiji mikoko ikekituluka. Anweba Lesa! Kabiji umvwe Jiwi Jenu, Baibolo, byo Yaamba, mikoko yonse Ikekyumvwa, mambo Ke Kajo ka mikoko. Baikala na lumvwang’ano. Abo bayuka musango ka wa Kajo ba Bataata ko bajisha. “Muntu kechi ukekela kushinkwa yeka ne, kana ku Kyambo kyonse kifuma mukanza kakwa Lesa.” Kiswishai, Nkambo, amba bavula bakimone ne kumvwisha, kabiji basakwiya kwi Anweba bufuku buno.

<sup>128</sup> Aba babula Mupashi Wazhila, kechi bamubike pa awala mukwabo ne. Kyakonsha kwikala kimye kyapwa mu awala mukwabo. Abo kape kechi bakonsha kutanwako ne.

<sup>129</sup> Kabiji, Taata, byo twabungakana kuyuwe tebulu pano na

kuja yuwe waimenako mubiji Wenu watebauka, twalomba mba inge muji bubi mukachi ketu, Nkambo, tulekelaiko mambo. Anweba mwaambile mba, “Umvwe mwaiya pamo, ipembelelai umo ne mukwabo.” Lesa, inge mujipo bubi mu kino kipwilo, kuji konse, Nalomba mba Mashi akwa Yesu Kilishitu abanye ao mwanamulume kufuma ku bubi bwanji, nangwa yewa mwanamukazhi, nsongwalume nangwa nsongwakazhi. Kabiji, Taata, Nalomba amiwa mwine, amba Anweba musakufumya ku luzhinauko lonse, bubi bonse, kubula luketekelo kuji konse, kintu kyonse... Twayuka mba kubula lwitabilo ke bubi. Bo bonka bubi bujiko. “Aye wabula kwitabila wazhatwa kala.” Kabiji bubi bonka bujiko, ke kubula kuketekela Kyambo kya Lesa ne. Kabiji, Taata, inge mujipo kubulwa luketekelo mwi amiwa, ndekelaiko mambo, Anweba Lesa, muji bwavula, kabiji Nalomba mba Anweba mundekelako mambo. Lekelaiko mambo kipwilo kyami kyo Mwapa bufuku buno, ne kwibajisha pa Kyambo. Kiswishai kye.

<sup>130</sup> Kabiji byo tubena kuja abye bivuluko bicheche bya mubiji watebuka wa Aye Ao wasangulwa kufuma ku bafu ne kwikala na bumi myaka ne myaka mukachi ketu, lekai tutambule kijilo kufuma kwi Aye, Nkambo, kushilang’ena kwa Mupshi Wazhila. Kiswishai kye, Taata. Twaipuzha mu Jizhina ja Yesu. Amena.

<sup>131</sup> Pano, kwi anweba bafwainwa kuya kechi mwakonsha kutanwako pepi nobe mamineti-fifitiini a kijilo... Kechi tuji bavula mwi atweba ne, kabiji tusakaja kijilo. Kechi ke kijilo kya kukanya bantu ne. Kyaikala ke kya yense Mwinakilishitu waitabila. Lesa kechi uji na mulaini ye banshila pakachi ka Baptist ne Methodist, ne bikwabotu ne. Atweba bonse, konka ku Mupashi umo, twabatizhiwa mu Mubiji umo, kabiji twi bangikazhi ba mu Bufumu bwa Lesa. Kabiji inge mujipo muntu umo mukachi ketu mwenyi, Amiwa kechi ntanwa kuno kimye kyabaya ne, kabiji amiwa kechi nayuka bamembala ne babula ne. Vulukai, nangwa wikale wa ku ng’anyi kipwilo, akyo kechi kijipo na kintu nakyo ne. Kujitu Kipwilo kimo, nangwa byonkabyo, kabiji kechi unungakana Nakyo ne, obewa wasemekwa Monka. Abyo ibyo. Kabiji obewa wasemekwa mu kikyete Kipwilo kya Lesa. Kabiji twalomba mba anweba musakutambula Kilishitu bufuku buno, ne kushilang’ana Nanji byo tubena kuvuluka mubiji Wanji watebuka, kabiji atwe tubintu bicheche to tuja, twa kijiilo kya lupitailo, kabiji lekai Lesa asanse michima yetu ne kapingu na Mashi.

<sup>132</sup> Pano bakaleta kijilo, kabiji tusakutanga pano kufuma mu Kolinda Mutanshi, kyapitala kyabu 12. Kabiji tusakuja kijilo bukiji bukiji panyumatu ya kikyete, kabiji twaketekela mba Lesa usa kwimupesha pakatampe. Kabiji byo tusakutangatu bibye, nangwa saka tukyangye kwikitanga, inge mwasaka kuya, kyawama, mwakonsha kulupukamo bulongo. Kabiji pano mukekale ne atweba jibiji Pakisatu bufuku, kabiji ne

Pamulungu lukeelo ne Pamulungu bufuku. Inge mwakonsha kwikala amba muje kijilo ne atweba, tusakwikala na lusekelo lwabaya bingi umvwe anweba mwikyuba. Kabiji panyumatu ya kyokyo, kusakwikala Nkambo . . . kusakwikala lubatizhilo lwa mu meema, alo lusakwikalako pepi nobe mu mamineti fifitini, nangwa tweti pabaishatu, Naketekela. Kolinda Mutanshi, kyapitala kyabu 11, veeleshi wabu 23.

*. . . Natambwile kwi Nkambo kyonkakyo kyo Nemufikizhizhe anweba, Namba aye Nkambo Yesu bonkabwa bufuku bumo . . . bo bamusolwele washikwile shinkwa:*

*Kabiji byo apaine lusachilo, aye watebwile, . . . kwaamba mba, Tolai, ne kuja: uno ye mubiji wami, wimutebukila anweba: sa mukoba kikyeye mu kundanguluka.*

*Kabiji byonkabyo ne katomeno nako, ne pakutopako, kwamba mba, Kano katomeno ye mulaye mupya wa mu mashi ami: sa mukoba kikyeye, monse mo mukatomanga, mu kundanguluka amiwa.*

*Mambo monse mo mukajanga shinkwa uno, ne kutoma katomeno kano, anweba mukasapwila lufu lwa Nkambo poso waiya.*

*Byonkabyo awa ukabula kuja ku uno . . . yense uja ku shinkwa uno, nangwa kutoma ku katomeno ka Nkambo, kyabula kufwainwa, ukazhatwa nao a mubiji ne a mashi a Nkambo.*

*Kabiji lekai muntu akieseke mwine, bino aje ku shinkwa uno, ne kutoma ku katomeno kano.*

*Mambo awa uja ne kutoma, umvwe ne kumona mubiji wa Nkambo ne, wijila ne kwitomena mwine luzhachisho.*

*Mambo na onka ano mambo bavula ba mwi anweba banekena ne kukolwa, . . . bamo bafwa kala.*

*Pakuuba umvwe twipima atwe bene, kechi tukazhatwe ne.*

*Kabiji byo twazhatwa, betufunda kwi Nkambo, amba kechi mukazhatwe pamo na ba panopantanda ne.*

*Byonkabyo, anweba bakwetu, byo mupwila pamo mu kuja, ipembelai anweba bene na bene.*

<sup>133</sup> Pano, atweba bonse twikale mu kimye kya kulomba na kuzhindama, ndombelaiko mu kimye kyo Mbena kwi mulombelela anweba. [Mulongo Branham walomba jiwi ja panshi—Waku.] . . . ? . . .

Swishai bibye bya kukabila, Lesa Wabulume bonse. Tulekelaiko mizhilulwila yetu byonka byo tulekela betulenga mambo. Akye twaipuzha mu Jizhina ja Yesu Kilishitu. Amena.

<sup>134</sup> Atwe tubipe twa shinkwa wa kukanga mwabula mbizho, byakutobesha, ne bikwobotu, ao wimenako mubiji wa Nkambo. Kechi wazhokoloka ne, wa mokaulwa mu bipivwa. Ke kyalumbulula mba mubiji Wanji witutebaukila atweba. Kabiji lekai Lesa aswishe mapesho Anji pa muntu yense usa kujako. Pano, kechi ke mubiji ne, kyaimenakotu mubiji. Amiwa kechi njipo na bulume, kafwako nangwa umo uji nayo ne, kwikilenga kwikala kintu kiji kyonse ne kanatu shinkwa. Lesa bunke bwanji. Kabiji abyo Aye byo etubuula, amba tukaje uno shinkwa ne kutoma kano katomeno ka binyu bya waini. Pano twayai tukunyike mitwe yetu.

<sup>135</sup> Lesa Wakila Mukuzhila, Atweba twibakalume banji, mu Jizhina ja Yesu Kilishitu, zhijikai yuwe shinkwa monka mo atongwelwa, kwitulengela atweba, byo tubena kumutambula, vulukai mba Nkambo yetu wapopelwe pa musalabu; kabiji mubiji Wanji, wawama kabiji wazhila byonka byo ajinga, wapuminwe na tumama ne miba ne misumali, na mambo atweba, amba kupichila mu mubiji Wanji watabaulwa mwafumine Mupashi witupa Bumi Bwapeenape. Lekai atweba, Nkambo, byo tubena kuja yuwe, tupewe lusa lwakwenda mu luno lwendo, byonka byo kyaubiwe kwi Isalela pa myaka foote monka mungyetu, kabiji kechi mwajingapo nangwa umo wakokelela ne. Taata Lesa, swishai kikye, byo tubena kulomba Anweba zhijikai yuwe shinkwa, shinkwa wakukanga, pakuuba mba engile mwingilo wao. Mwi Yesu Mujizhina. Amena.

<sup>136</sup> Kapu wa mu Lulayang'ano Lupya, wa Mashi. Nalanguluka pa yewa lwimbo:

Konka kulwitabilo ko Namwenejile aka kakola  
Byo aichikile,  
Butemwe bwakunkula bwaikala ke kikomo  
kyami,  
Kabiji ukekala poso Nafwa.

<sup>137</sup> Inge Namona ao mashi, magelepu, a a mashi amagelepu, Nayuka mba kyaimenako Mashi afumine mu mubiji wa Nkambo Yesu. Lekai yense wakutambula bibye ekale na Bumi Bwapeenape, lekai misongo ifume mu mibiji yabo, lekai kukoka ne kunekena, kumanyikwa, lekai diabola (mu musango uji yense) ebaleke, pakuuba mba bekale na bulume bukatampe ne Bumi Bwapeenape, lekai kyeya kyabo kisame ku meso a kikye kisemi kya bubu ne kya bukende kyotwikalamo, pakuuba mba tutumbijike Lesa.

<sup>138</sup> Taata Wamwiulu, twapana kwi Anweba kipangwa kya ku kichi. Mu Jizhina ja Yesu Kilishitu, kizhijikai, kwimenako Mashi a Mwaana Wenu, Yesu, mwi Aye mo twaikela nabyo,

“Wafumpilwe mambo amizhilulwila yetu, ku bipumo Byanji ko twabukilwa.” Kiswishai, Nkambo, amba Bumi bwakonsha kwiya kwi atweba, Bumi Bwapeenape bwavujisha bingi, pakuuba mba Anweba twimwingijile bulongo, twikale na bulume ne bumi bwawama bwa kwitwendesha kufuma pa kifulo kimo ne kuya pa kikwabo po twafwainwa kwimwingijila Anweba, konse Anweba ko muketwita. Swishai ao mapesho, mu Jizhina ja Yesu, twalomba. Amena. 🐦

62-0204 Kijilo  
Branham Tabernacle  
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)